

舊

唐

書

二七



唐書列傳卷第九十三

劉

聞人詮校刻

等修

李懷仙

朱希彩附弟

朱滔

劉怱

怱子濟

雍

程曰

華
華子懷直

李全

全署子同捷

李懷仙柳城胡人也世事契丹降將守營州祿山之叛懷仙以裨將從陷河洛安慶緒敗又事史思明善騎射有智數朝義時僞授爲燕京番守范陽尹寶應元年元帥雍王統迴紇諸兵收復東都朝義渡河北走乃令副元帥僕固懷恩率兵追之時羣兇瓦解國威方振賊黨聞懷恩至望風納款朝義以餘孽數千奔范陽懷仙誘而擒之斬首來獻屬懷恩私欲樹黨以固兵權乃保薦懷仙可用代宗復授幽州大都督府長史檢校侍中幽州盧龍等軍節度使與賊將薛嵩田承嗣張忠志等分河朔而帥之旣而懷恩叛逆西蕃入寇朝廷多故

懷仙等四將各招合遺孽治兵繕邑部下各數萬勁兵文武將吏擅自署置貢賦不入於朝廷雖稱藩臣實非王臣也朝廷初集姑務懷安以是不能制懷仙大曆三年爲其麾下兵馬使朱希彩所殺希彩自稱晉後恒州節度使張忠志以懷仙世舊無辜覆族遣將率衆討之爲希彩所敗朝廷不獲已宥之以河南副元帥黃門侍郎同平章事王縉爲幽州節度使授希彩御史中丞充幽州節度副使權知軍州事詔縉赴鎮希彩聞縉之來蒐選卒伍大陳戎備以逆之縉晏然建旌節而希彩迎謁甚恭縉知終不可制勞軍旬日而還尋加希彩御史大夫充幽州節度留後十二月加希彩幽州大都督府長史幽州盧龍軍節度使五年封高密郡王旣得位暴橫自恣無禮於朝廷七年孔目官李瑗因人之怒伺隙斬之軍人立其兵馬朱泚爲晉後泚自有傳

朱滔賊泚之弟也平州刺史朱希彩爲幽州節度以滔同姓甚愛之常令將腹心親兵及泚爲節度使遂使滔將勁兵三千赴京師請率

先諸軍備塞自祿山反後山東范陽外雖示順實皆倔强不庭泚首
効臣節代宗喜甚命滔勒兵東入長安通化門西出開遠門出師勞
還未有兵還王城者今而許之蓋示優異召滔對于三殿代宗臨軒
勞問既而曰卿材孰與泚多滔曰各有長短統御士衆方略明辨臣
不及泚臣年二十八獲謁龍顏泚長臣五歲未朝鳳闕此不及臣代
宗愈喜大曆九年泚朝覲因乞留西征吐蕃以滔試殿中監權知幽
州盧龍節度留後兼御史大夫及田承嗣反與李寶臣李正己等解
磁州圍建中二年寶臣死其子惟岳謀襲父位滔與成德軍節度張
孝忠征之大破惟岳於東鹿滔命偏師守東鹿進圍深州惟岳乃統
萬餘衆及田悅援兵圍東鹿惟岳將王武俊以騎三十方陳橫進滔
績帛爲後視象使猛士百人蒙之鼓譟奮馳賊爲驚亂隨擊大破之
惟岳焚營而遁以功加檢校司徒爲幽州盧龍軍節度使以德棣二
州隸焉朝廷以康日知爲深趙二州團練使王武俊爲恒冀二州團
練使滔怒失深州武俊怒失寶臣故地滔構武俊同己反馬燧圍田

悅于魏州悅告急滔與武俊遂連兵救悅敗李懷光於恆山三年十一月滔僭稱大異王僞署百官與李納田悅王武俊並稱王南結李希烈興元初田悅王武俊以朱泚據京師滔兵強盛首尾相應田悅常謂武俊曰朱滔心險不可隄防遂相率歸順泚既僭號立滔爲皇太弟仍令以重賂招誘迴紇南攻魏貝卽西入關興元元年正月滔驅率燕薊之衆及迴紇雜虜號五萬次南河攻圍貝州三月田緒殺田悅魏州亂滔令大將馬寔分兵逼魏州營于王莽河德宗在山南慮二兇兵合遣使授王武俊平章事令與李抱真叶力擊滔四月恒潞兩軍次涇城北行營相距十里抱真自率二百騎徑入武俊軍面申盟約結爲兄弟五月四日進軍距貝州三十里而軍翌日滔令大將馬寔盧南史引迴紇契丹來挑戰武俊遣騎將趙珍提精騎三百當之抱真將王虔休犄角待之武俊與其子士清自當迴紇契丹部落兩軍旣合鼓譟震地迴紇恃捷穿武俊陣而過武俊乘騎勒馬不動俟迴紇引退因而薄之迴紇勢不能止武俊父子縱馬急擊獲迴

紇三百騎滔陣亂東走兩邊追斬俘馘數萬計遇夜夾滔壘而軍是夜滔以殘衆千人奔德州委棄戈甲山積滔至瀛州殺騎將蔡雄揚布以其前鋒先敗又殺陰陽人尹少伯以其言舉兵必勝故也六月李晟收京城朱泚姚令言死滔還幽州爲武俊所攻僅不能軍上章待罪九月詔曰朱滔累獻欵疏深効懇誠省之惻然良用憫嘆宜委武俊抱眞開示大信深加曉諭若誠心益固善跡克彰朕當掩疊錄勲與之昭雪貞元元年尋卒于位時年四十贈司徒

劉怦幽州昌平人也父貢常爲廣邊大斗軍使怦卽朱滔姑之子積軍功爲雄武軍使廣屯田節用以辦理稱稍遷涿州刺史居數年朱滔將兵討田承嗣奏署怦領番府事以寬緩得衆心時李寶臣爲田承嗣間說與之通謀承嗣又以滄州與寶臣乃以兵劫朱滔於瓦橋關滔脫身走乘勝欲襲取幽州怦設方略鎮撫寶臣不敢進以功加御史中丞寶臣死子惟岳拒朝命德宗令滔與張孝忠同力討之及惟岳平滔怨朝廷違約不與深州含怒不已會王武俊亦怨割地深

趙相謀叛欲救田悅怙時知幽州番後事遣人齎書謂滔曰司徒位
崇太尉尊居宰相恩寵冠藩臣之右榮遇極矣今昌平故里朝廷改
爲尉卿司徒里此亦大夫不朽之名也但以忠順自持則事無不濟
竊思近日務大樂戰不顧成敗而家滅身屠者安史是也暴亂易亡
今復何有怙忝密親世荷恩遇默而無告是負重知惟司徒圖之無
貽後悔也滔雖不用其言亦嘉其盡言卒無疑貳凡出征伐必以怙
揔番後事及僭稱大冀王僞署怙爲右僕射范陽留守及泚據京邑召
滔南河至貝州挫敗而還兵甲盡喪怙聞滔將至悉蒐范陽兵甲夾
道排列二十餘里以迎滔歸於府第人皆嘉怙忠義貞元二年滔卒
三軍推怙權撫軍府事怙爲衆所服卒有其地朝廷因授怙幽州大
都督府長史兼御史大夫幽州盧龍節度副大使知節度事管内營
田觀察押奚契丹經略盧龍軍使居位三月而卒貞元元年九月卒
年五十九廢朝三日贈兵部尚書賜布帛有差子濟繼爲幽州節度
使

濟怙之長子初母難產旣產侍者初見濟是一大地黑氣勃勃莫不驚走及長頗異常童所居室焚人皆驚救濟從容而出衆異之累歷本管州縣牧宰及怙爲節度使以濟兼御史中丞充行軍司馬怙卒軍人習河朔舊事請濟代父爲帥朝廷姑務使安因而從之累加至檢校兵部尚書貞元五年遷左僕射充幽州節度使時烏桓鮮卑數寇邊濟帥軍擊走之深入千餘里虜獲不可勝紀東北晏然貞元中朝廷優容藩鎮方甚兩河擅自繼襲者尤驕蹇不奉法惟濟最務恭順朝獻相繼德宗亦以恩禮接之尋加同中書門下平章事順宗卽位再遷檢校司徒元和初加兼侍中及詔討王承宗諸軍未進濟獨率先前軍擊破之生擒三百餘人斬首千餘級獻逆將於闕優詔褒之又爲詩四韻上獻以表忠憤之志明年春將大軍次瀛州累攻樂壽博陸安平等縣前後大獻俘獲賞功頗厚仍與子孫六品官者凡四人未幾有疾會赦承宗錄功拜兼中書令濟在鎮二十餘年雖輸忠款竟不入覲又謀殺其弟澶澶歸國爲信臣及濟疾次子總與濟

親吏唐弘實通謀酖殺濟數日乃發喪時年五十四詔贈太師廢朝三日賻禮有加謚曰莊武弟源貞元十六年八月爲檢校工部尚書兼左武衛將軍初爲涿州刺史不受兄教令濟奏之貶漠州參軍復不受詔濟帥師至涿州源出兵拒之未合而自潰濟擒源至幽州上言請令入覲故授官以徵之

雍濟之異母弟也喜讀書工武藝輕財愛士得人死力事朱滔常陳逆順之理後怍爲盧龍軍節度使病將卒雍在父側卽以父命召兄濟自漠州至竟得授節度使濟常感雍奉已雍爲瀛州刺史亦許以雍代已任其後濟乃以其子爲副大使雍旣歿濟遂請以所部西捍隴塞拔其所部兵一千五百人男女萬餘口直趨京師在道無一人犯令者德宗寵遇特授秦州刺史以普潤縣爲理所及順宗傳位稱太上皇有山人羅令則諂雍言異端數百言皆廢立之事雍立命擊之令則又云某之黨多矣約以德宗山陵時伺便而動雍械令則送京師杖死之後錄功賜其額曰保義其軍蕃戎畏之不敢爲寇常有

復河湟之志議者壯之元和二年十二月卒總濟之第二子也性陰賊險譎元和五年濟奉詔計王承宗使長子緄假爲副使領留務時總爲瀛州刺史濟署爲行營都兵馬使屯軍饒陽師久無功總潛伺其隙與判官張玘孔目官成國寶及帳內小將爲謀使詐自京至曰朝廷以相公逗留不進除副大使爲節度使矣明日又使人曰副大使旌節已到太原又使人走而呼曰旌節過代州舉軍驚恐濟驚惶憤怒不知所爲因殺主兵大將數十人及與緄素厚者乃追緄以張玘兄臯代知留務濟自朝至日晏不食渴索飲總因實毒而進之濟死緄行至涿州總矯以父命杖殺之總遂領軍務朝廷不知其事因授以斧鉞累迁至檢校司空及王承宗再拒命總遣兵取賊武強縣遂駐軍持兩端以利朝廷供饋賞賜是時吳元濟尚存王承宗方跋扈易定孤危憲宗暫務姑息加總同中書門下平章事及元濟就擒李師道臯首王承宗憂死田弘正入鎮州總旣無黨援懷惧每謀自安之計初總弑逆後每見父兄爲崇甚慘惧乃於官署後置數高僧教

厚給衣食令晝夜乞恩謝罪每公退則憇于道場若入他室則怙惕不敢寐晚年恐悸尤甚故請落髮爲僧異以脫禍乃以判官張臯爲留後總以落髮上表歸朝穆宗授天平軍節度使旣聞落髮乃賜紫號大覺師總行至易州界暴卒輟朝五日贈太尉擇日備禮冊命賻絹布一千五百段米粟五百石先是元和初王承宗阻兵總父濟備陳征伐之術請身先之及出軍累拔城邑旋屬被病不尅成功總旣繼父願述先志且欲盡更河朔舊風長慶初累疏求入覲兼請分割所理之地然後歸朝其意欲以幽涿營州爲一道請弘靖理之瀛州漢州爲一道盧士玫理之平薊矯檀爲一道請薛平理之仍籍軍中宿將盡薦於闕下因望朝廷升獎使幽薊之人皆有希美爵祿之意及䟽上穆宗且欲速得范陽宰臣崔植杜元穎又不爲久大經略但欲重弘靖所授而未能省其使局惟瀛漠兩州許置觀察使其他郡縣悉命弘靖統之時總所薦將校又俱在京師旅舍中久而不問如朱克融輩僅至假衣丐食日詣中書求官不勝其困及除弘靖又命

悉還本軍克融輩雖得復歸皆深懷缺望其後果爲叛亂總旣以土地歸國授其弟約及男等一十一人領郡符加命服者五人升朝班佐宿衛者六人

程日華定州安喜人本單名華父元皓事安祿山爲帳下將從陷兩京頗稱勇力史思明時爲定州刺史華少事本軍爲張孝忠牙將初李寶臣授恒州節度吞削藩隣有恒興深趙易定滄德等八州寶臣旣卒惟岳拒朝命以圖繼襲寶臣部將張孝忠以定州歸國授成德軍節度使今與朱滔討惟岳及惟岳誅朝廷以恒冀授王武俊深趙授康日知易定滄授張孝忠分爲三帥時惟岳將李固烈守滄州孝忠令華詣固烈交郡固烈將歸真定悉取滄州府藏累乘而還軍人怒殺固烈皆奪其財相與詣華曰李使君貪鄙而死軍州請押牙權領不獲已從之孝忠因授華知滄州事未幾朱滔合武俊謀叛滄定往來艱阻二盜遂欲取滄州多遣人遊說又加兵攻圍華俱不聽從乘城自固久之錄事參軍李宇爲華謀曰使君受圍累年張尚書不

能致援論功獻捷須至中山所謂勞而無功者也請爲足下至京師
自以一州爲使華卽遣之宇入闕備陳華當二盜之間疲於矢石德
宗深嘉之拜華御史中丞滄州刺史復置橫海軍以華爲使尋加工
部尚書御史大夫賜名曰華仍歲給義武軍糧餉數萬自是別爲一
使孝忠唯有易定二州而已武俊遣人說華歸已華曰相公欲弊邑
仍舊隸恒州且借騎二百以抗賊俟道路通卽從命武俊喜卽以二
百騎助之華乃留其馬遣人皆還武俊怒其背約又以朱滔方攻圍
慮爲所有而止及武俊歸國河朔無事日華卽遣所留馬還武俊別
陳珍幣謝過武俊歡然而釋貞元四年卒贈兵部尚書子懷直
懷直習河朔事父卒自知留後事朝廷嘉父之忠起復授檢校工部
尚書兼御史大夫升橫海軍爲節度以懷直爲留後又於弓高縣置
景州管東光景城二縣以爲屬郡累加至檢校尚書右僕射五年
起復正授節度觀察使懷直荒於畋獵數日方還不恤軍政軍士不
勝寒餒其帳下將從父兄懷信因衆怒閉門不內懷直因來朝覲貞

元九年也德宗優容之依前檢校右僕射兼龍武統軍賜安業里甲第妓女一人既而懷信死懷直子執恭知留後事乃遣懷直歸滄州十六年卒年四十九廢朝一日贈楊州大都督執恭代襲父位朝廷因而授之元和六年入朝憲宗禮遇遣之加尚書左僕射嘗夢滄州衙門樓額悉帖權字遂奏請改名權十三年淮西賊平藩方惕息權以父子世襲如三鎮事例心不自安乃請入朝十三年至京師表辭戎帥因命華州刺史鄭權代之以靖安里私第側狹賜地二十畝令廣其居尋遷檢校司空邠州刺史邠寧節度使十四年十一月卒贈司徒權兄弟子姪在朝列宿衛者三十餘人

李全畧者本姓王名曰簡爲鎮州小將事王武俊元和中節度使王承宗沒軍情不安自拔歸朝授代州刺史及長慶初鎮州軍亂殺田弘正穆宗爲之旰食以日簡嘗爲鎮將召問其計日簡遂於御前極言利害兼願有以自効因授德州刺史經略其事明年擢拜橫海軍節度使賜姓李氏名全略以崇樹之未幾令子同捷入侍兼進錢千

萬踰歲同捷歸覲乃奏請授滄州長史知州事兼主中軍兵馬朝廷初不之許後慮其有奇策將副經略之旨遂從之及得請全畧乃陰結軍士潛爲久計外示忠順內蓄姦謀棣州刺史王稷善撫衆且得其心全略忌而殺之仍孥戮其屬凡所爲事大率類此寶曆二年四月卒子同捷初爲副大使居喪擅領留後事仍重賂藩鄰以求繼襲朝廷知其所爲經年不問屬昭愍晏駕文宗卽位同捷與易世之後稍行恩貸卽令母弟同志同巽入朝令掌書記崔長奉表備達懇誠請從朝旨詔授同捷檢校左散騎常侍兗州刺史充海節度使以天平節度使烏重胤爲滄州節度以代之詔下同捷託以三軍乞留拒命乃命烏重胤率鄆齊兵加討又詔徐帥王智興滑帥李聽平盧康志睦魏博史憲誠易定張璠幽州李載義等四面進攻同捷世行姦詐自以嘗在成德軍爲將校燕趙之師可結爲城社乃以玉帛子女賂河北三鎮以求旌鉞李載義初受朝命堅於効順乃囚同捷姪及所賂玉帛妓女四十七人表獻又表朝廷加載義左僕射王廷湊司

徒以悅其心事廷湊本蓄狼心欲吞橫海乃出兵于境以赴同捷王智興師次棣州詔曰李同捷幸襲舊勳不思續緒斬麻未幾私行墨緣毒殺忠良擾惑部校稽之國憲難追常刑朕以頃在先朝已稽中旨寔遵成命未議改圖乃由留務之權授以戎帥拔負海之陋置之中華推恩含垢斯亦至矣而同捷益懷迷執閉境練兵大詬鄰封拒捍中使遐邇憤怨中外驚嗟叛命既彰大義當絕事非獲已良用撫然其在同捷在身官爵並宜削奪令諸軍進討俄而烏重胤卒授神策節度使李寰代重胤出師無功召還乃加王智興平章事充行營招撫使史憲誠遣大將刁志治與子唐帥兵二萬五千攻德州大和二年九月智興收棣州因割隸淄青時諸軍在野朝廷特置供軍糧料使日費浸多兩河諸帥每有小捷虛張俘級以邀賞賚實欲困朝廷而緩賊也繒帛征馬賜之無筭同捷既窘王廷奏援之不及乃令入誘刁志治俾倒戈攻憲誠許以代爲魏博節度志治信其言而叛憲誠告難詔李聽以諸道兵攻之志治敗奔于鎮州李寰赴闕又

以李祐代爲橫海節度三年三月詔諫議大夫栢耆軍前慰撫四月
李祐收德州同捷乞降于祐祐疑其詐栢耆請以騎兵三百入滄州
祐從之耆徑入滄州取同捷與其家屬赴京師其月二十六日至德
州界謀言廷湊兵來劫篡耆乃斬同捷首傳而獻捷百寮稱賀同捷
母孫妻崔兒元達等旣獻詔悉宥之配於湖南安置

史臣曰國家崇樹藩屏保界山河得其人則區宇以寧失其授則干
戈勃起若懷仙之輩習亂河朔志深狡蠹忠義之談罔經耳目以暴
亂爲事業以專殺爲雄豪或父子弟兄或將帥卒伍迭相屠滅以成
風俗斯乃王道寢微教化不及惜哉蒸民陷彼虎吻其間劉總粗貶
臣誠然而殺父兄以圖榮落髣髴而避禍未旋踵而暴卒他境斯謂
報應之驗與

贊曰國法不綱賊臣鴟張雖曰父子兇如虎狼惡稔族滅身屠地亾
蠢茲伏莽汗我彝章

唐書列傳卷九十四

劉

聞人詮校刻沈

潤同校

等修

尚可孤

李觀

戴休顏

陽惠元

李元諒

韓遊瓌

賈隱林

杜希全

尉遲勝

邢君牙

楊朝晟

張敬則

尚可孤東部鮮卑宇文之別種也代居松漠之間天寶末歸國隸范

陽節度安祿山後事史思明上元中歸順累授左右威衛二大將軍

同正充神策大將以前後功改試太常卿仍賜實封一百五十戶魚

朝恩之統禁軍受其舅甚委遇之俾爲養子奏姓魚氏名智德以禁

兵三千鎮于扶風縣後移武功可孤在扶風武功凡十餘年士伍整

肅軍邑安之朝恩死賜可孤姓李氏名嘉勳會李希烈反叛建中四

年七月除兼御史中丞荆襄應援淮西使仍復本姓名尚可孤以所

統之衆起山南累有戰功及涇原兵叛詔徵可孤軍至藍田賊衆方盛遂營於七盤修城柵而居之賊將仇敬等來寇可孤頻擊破之因收藍田縣興元元年三月遷檢校工部尚書兼御史大夫神策京畿渭南商州節度使四月仇敬來寇可孤率兵急擊擒仇敬斬之遂進軍與副元帥李晟決策攻討五月晟率可孤及駱元光之軍收京城可孤之師爲先鋒京師平以功陞檢校右僕射封馮翊郡王增邑通前八百戶實封二百戶可孤性謹愿沉毅既有勲勩衆會之中未嘗言功賊平之後營於白花亭御衆公平號令嚴整時人稱焉李晟甚親重之及李懷光以河中叛詔可孤帥師與諸軍進討次於沙苑遇疾卒于軍贈司徒賻布帛米粟加等喪葬所須並令官給

李觀洛陽人其先自趙郡徙焉秋官員外郎敬仁姪孫也少習武藝沉厚寡言有將帥識度乾元中以策干朔方節度使郭子儀子儀善之令佐坊州刺史吳仲充防遏使尋以憂免居藍屋別業廣德初吐蕃入寇鑾駕之陝觀於藍屋率鄉里子弟千餘人守黑水之西戎人不

敢近會領南節度楊慎微將之鎮以觀權謀奏充偏將俾總軍政及徐浩李勉繼領廣州尤加信任麾下兵甲悉委之平馮崇道朱泚時有功累迁大將李勉移鎮滑州累奏授試殿中監加開封府儀同三司追赴闕授右龍武將軍建中末涇師叛觀時上直領衛兵千餘人扈從奉天詔都巡警訓練諸軍戍卒三數日間加召二千餘衆列之通衢整肅鼙鼓城內因之增氣德宗倚賴之賜封二百戶二子宏寓授八品京官及駕出奉天與今狐建李昇韋清等咸執羈勒周旋艱險皆著功勞駕還京師詔總後軍禁衛興元元年閏十月拜四鎮北庭行軍涇原節度使檢校兵部尚書在鎮四年雖無拓境之績勵卒儲糧訓整寧輯及平涼之師會渾瑊既無戒備觀伺知狡謀潛擇精兵五千要伏險道及瑊遁歸賴觀游軍及李元諒之師表裏以免帝優賞賜賚甚厚特詔褒美其年朝京師除少府監檢校工部尚書以疾終貞元四年贈太子少傅

戴休顏夏州人在軍伍以膽略稱大曆中爲郭子儀部將以戰功累

遷至塩州刺史奉天之難倍道以所部蕃漢三千人號泣赴難德宗嘉之賜實封二百戶與渾瑊杜希全韓遊瓌等捍禦有功車駕再幸梁洋雷守奉天及李懷光叛據咸陽使誘休顏休顏集三軍斬其使嬰城自守懷光大駭遂自涇陽夜遁其月拜檢校工部尚書奉天行營節度使李晟收京師乃與渾瑊破泚偏師斬首三千級休顏追賊至中渭橋李晟既清宮闕休顏與瑊等率兵赴岐陽邀擊泚餘衆及策勲加檢校右僕射封至六百戶七月扈駕至京特賜女樂甲第以褒功伐尋拜左龍武將軍貞元元年卒年五十九廢朝一日贈賻有差

陽惠元平州人以材力從軍隸平盧節度劉王臣後與田神功李忠臣等相繼泛海至青齊間忠勇多權略稱爲名將又以兵隸神策充神策京西兵馬使鎮奉天初大曆中兩河平定事多姑息李正巳有淄青濟海登萊沂密德曹濮徐兗鄆十五州之地養兵十萬李寶臣有恒易深趙滄冀定七州之地有兵五萬田承嗣有魏博相衛洺貝

澶七州之地有兵五萬梁崇義有襄鄧均房復郢六州之地其衆二萬皆始因叛亂得侯各擅土宇雖泛稟朝旨而威刑爵賞生殺自專盤根結固相爲表裏朝廷常示大信不爲拘限緩之則嫌豐自作急之則合謀或聞詔旨將增一城浚一池必皆怨怒有辭則爲之罷役而自於境內治兵繕壘以自固凡歷三朝殆二十年國家不敢興拳石撮土之役代宗性寬柔無怒一切從之凡河朔諸道健步奏計者必獲賜賚及德宗即位嚴察神斷自誅劉文喜之後知朝法不可犯四盜俱不自安奏計者空還無所賞賜歸者多怨或傳說飛語云帝欲東封汴州奏以城隘狹增築城郭李正已聞之移兵萬人屯于曹州田悅亦加兵河上河南大擾羽書警急乃詔移京西戎兵萬二千人以備關東帝御望春樓親誓師以遣之曰嗚呼東鄙之警事非獲已唯爾將校羣士各以忠節勤於王家南赴蜀門西定涇壘甲冑不解瘡痍未平今載用爾分鎮于周鄭之郊敬聽明命夫王者之師有征無戰稽諸理道用正邦國宜勵乃戈甲保固城池以德和人以義

制事將備其侵軼不用越境攻取戢而後動可謂正矣今外夷來庭方
春生植品物資始農桑是時俾爾將士暴露中野我心痛悼鬱如焚
灼嗟爾有衆其悉予懷士卒多泣下及賜宴諸將列坐酒至神策將
士皆不飲帝使問之惠元時爲都將對曰臣初發奉天本軍帥張巨
濟與臣等約曰斯役也將策大勳建大名凱旋之日當共爲歡苟未
戎捷無以飲酒故臣等不敢違約而飲旣發有司供餼於道路他軍
無子遺唯惠元一軍鉅壘不發上稱嘆久之降璽書慰勞及田悅反
叛詔惠元領禁兵三千與諸將討伐御河奪三橋皆惠元之功也尋
加檢校工部尚書攝貝州刺史令以兵屬李懷光建中四年冬自河
朔與懷光同赴國難解奉天之圍明年二月懷光背國叛逆惠元義
不受汙脫身奔竄奉天會乘輿南幸懷光怒惠元之逸令其將冉宗
以百餘騎追及於好畤縣惠元計窮父子三人並投人家井中冉宗
並出而害之興元元年贈右僕射仍賻絹百匹惠元男尚食奉御晟
贈殿中監左衛兵曹參軍高贈邠州刺史褒死難也

李元諒本駱元光姓安氏其先安息人也少為宦官駱奉先所養冒姓駱氏元諒長大美鬚勇敢多計少從軍備宿衛積勞試太子詹事鎮國軍節度使李懷讓署奏鎮國軍副使俾領州事元諒嘗在潼關領軍積十數年軍士皆畏服德宗居奉天賊泚遣偽將何望之輕騎襲華州刺史董晉弃州走望之遂據城將聚兵以絕東道元諒自潼關將所部仍令義兵因其未設備徑攻望之遂拔華州望之走歸元諒乃修城隍器械召募不數日得兵萬餘人軍益振以功加御史中丞賊泚數遣兵來寇輒擊却之是時尚可孤守藍田與元諒犄角賊東不能逾渭南元諒功居多無幾遷華州刺史兼御史大夫潼關防禦鎮國軍節度使尋加檢校工部尚書興元元年五月詔元諒與副元帥李晟進收京邑兵次於滻西賊悉衆來攻元諒先士卒奮擊大敗之進軍至苑東與晟力戰壞苑垣而入賊聯戰皆敗遂復京師元諒讓功於晟出屯於章敬佛寺帝還宮加檢校尚書右僕射實封七百戶賜甲第女樂仍與一子六品正真官李懷光反於河中絕河津

詔元諒與副元帥馬燧渾瑊同討之時賊將徐庭光以銳兵守長春宮元諒遣使招之庭光素輕易元諒且慢罵之又以優胡為戲於城上辱元諒先祖元諒深以為耻及馬燧以河東兵至庭光降於馬燧詔以庭光為試殿中監兼御史大夫河中平燧待庭光益厚元諒因遇庭光於軍門命左右劫而斬之乃詣燧匍請罪燧盛怒將殺元諒久之以其功高乃止德宗以元諒專殺慮有章疏先令宰相諭諫官勿論貞元三年詔元諒將本軍從渾瑊與吐蕃會盟于平涼元諒謂瑊曰本奉詔令營於潘原堡以應援侍中竊思潘原去平涼六七十里蕃情多詐儻有急變何由應赴請次侍中為營瑊以違詔固止之元諒竟與瑊同進瑊營距盟所二十里元諒營次之壕柵深固及瑊赴會乃戒嚴部伍結陣營中是日虜果伏甲乘瑊無備竊發時士大夫皆朝服就執軍士死者十七八瑊單馬奔還群虜追躡瑊營將李朝彩不能整衆多已奔散瑊至空營而已賴元諒之軍嚴固瑊既入營虜皆散去是日無元諒軍瑊幾不免元諒乃整軍先遣輜重次

與瑊俱申號令嚴其部伍而還時謂元諒有將帥之風德宗嘉之賜良馬十匹金銀器錦綵等甚厚丁母憂加右金吾衛上將軍起復本官帝念其勤勞又賜姓李氏改名元諒四年春加隴右節度支度營田觀察洮臨軍使移鎮良原良原古城多摧圯隴東要地虜入寇常牧馬休兵於此元諒遠烽堠培城補堞身率軍士與同勞逸芟林薙草斬荆榛俟乾盡焚之方數十里皆爲美田勸軍士剋藝歲收粟菽數十萬斛生殖之業陶冶必備仍距城築臺上設車弩爲城守備益固無幾又進築新城以據便地虜每寇掠輒擊卻之涇隴由是乂安虜深憚之以疾貞元元年十一月卒于良原年六十二帝甚悼惜廢朝三日贈司空賻布帛米粟有差

韓遊瓌河西靈武人仕本軍累歷裨補積功至邠寧節度使德宗出幸奉天衛兵未集遊瓌與慶州刺史論惟明合兵三千人赴難自乾陵北過赴醴泉以拒泚會有人自京城來言賊信宿當至上遽令追遊瓌等軍伍絕入壁泚黨果至乃出鬪城下小不利乃退入城賊急

奪門遊瓌與賊隔門血戰會暝方解自是賊日攻城遊瓌惟明乘城拒守躬當矢石不暇寢息赴難之功遊瓌首焉李懷光反從駕山南德宗以禁軍無職局六軍特置統軍一員秩從二品以遊瓌惟明賈隱林等分典從駕禁兵李晟移軍東渭橋與駱元光尚可孤分扼京東要路渾瑊與遊瓌戴休顏分典京西要路犄角進攻興元元年檢校刑部尚書兼御史大夫例授奉天定難功臣李晟收京城遊瓌三將亦破賊於咸陽德宗自興元還京渾瑊與遊瓌休顏三將從李晟尚可孤駱元光三將奉迎論功行封與瑊等相次還鎮邠寧三年以子欽緒與妖賊李廣弘同謀不軌時遊瓌鎮長武城事將發欽緒奔于邠州邠州將吏械送京師遊瓌以子大逆請代歸固欲詣闕詔不許遊瓌鑣繫欽緒二子送京師請從坐上亦有之十二月遊瓌入朝素服待罪入朝堂遽命釋之勞遇如故復令還鎮初遊瓌入覲邠州將吏以其子謀叛又御軍無政謂必受代餞送之禮甚薄及遊瓌見上盛論邊事請築豐義城以備蕃寇上以特達委用如初及還鎮軍

中惧不自安大將范希朝善將兵名聞軍中遊瓌畏其逼已將因事誅之希朝惧出奔鳳翔上素知名召入宿衛及遊瓌遣五百人築豐義城兩板而潰又寧州戍卒數百人縱掠而叛其無方略失士心皆此類也自寧州卒叛吐蕃入寇遊瓌自率衆戍寧州四年七月除將軍張獻甫代遊瓌不俟獻甫至又不告衆知乃輕騎夜出歸朝將卒素驕聞獻甫嚴急因其無帥縱兵大掠且圍監軍楊明義第請奏范希朝爲帥都虞候楊朝晟初逃難郊外翌日聞請希朝乃復入城與軍衆曰所請甚愜我來賀也叛卒稍安朝晟乃與諸將密謀晨率甲兵而出召叛卒告曰前請者不獲張尚書來昨日已入邠州汝等謀叛皆當死吾不盡殺誰爲賊首各言之以罪歸之餘悉不問於衆中唱二百餘人立斬之軍城方定上聞軍情欲希朝乃授寧州刺史爲獻甫邠寧之副遊瓌至京授右龍武統軍十四年卒李廣弘者或云宗室親王之胤落髮爲僧自云見五岳四瀆神已當爲人主貞元三年自邠州至京師有市人董昌者通導廣弘舍于資敬寺尼智因之

室智因本宮人董昌以酒食結殿前射生將韓欽緒李政諫南珍霞
神策將魏修李儵前越州參軍劉昉陸緩陸絳陸充徐綱等同謀爲
逆廣弘言岳瀆神言可以十月十日舉事必捷自欽緒已下皆有署
置爲宰相以智因尼爲后謀於舉事日夜令欽緒擊鼓於凌霄門焚
飛龍廐舍草積又令珍霞盜擊街鼓集城中人又令政諫修儵等領
射生神策兵內應事克縱剽五日朝官悉殺之事未發魏修李儵上
變令內官王希遷等捕其黨與斬之德宗因禁止諸色人不得輒入
寺觀

賈隱林者滑州牙將也建中初爲本軍兵馬使令率兵宿衛朱泚之
亂諸軍未集隱林率衆扈從性質朴在奉天賊急攻城隱林與侯仲
莊遂急救應難險備至旣而懷光軍至逆賊解圍從臣稱慶隱林抃
舞畢奏曰賊泚奔遁臣下大慶此皆宗社無疆之休然陛下性靈太
急不能容忍若舊性未改賊雖奔亡臣恐憂未艾也上不以爲忤甚
稱之累官至檢校右散騎常侍封武威郡王將幸山南而卒贈左僕

射賜其家實封三百戶賻絹百匹米百碩喪葬官給

杜希全京兆醴泉人也少從軍嘗爲郭尚父子儀裨將積功至朔方軍節度使軍令嚴肅士卒皆悅服初德宗居奉天希全首將所部與塩州刺史戴休顏夏州刺史時常春合兵赴難軍已次漢谷爲賊泚邀擊乘高縱礮又以大弩射之者衆德宗令出兵援之不得進希全退次邠州以赴難功加檢校戶部尚書行在都知兵馬使從幸梁州帝還京師遷太子少師檢校右僕射兼靈州大都督御史大夫受降定遠城天德軍靈塩豐夏等州節度支度營田觀察押蕃落等使餘姚郡王希全將赴靈州當獻體要八章多所規諫德宗深納之乃著君臣箴以賜之其辭曰夫惟德惠人惟辟奉天從諫則聖共理惟賢皇立有極駿命不易揔萬機以成務齊六合之殊致一心不能獨鑑一目不能周視敷求哲人式序在位於戲君之任臣必求一德臣之事君咸思正直何啓沃之所宜自古今而未得且以讜言者逆耳諛諛者伺側故下情未通而上聽已惑俾夫忠賢敗於凶慝譬彼輕舟

蒸徒揖之亦有和羹宰夫膳之孰云理國不自得師覆車之軌予其懲而高以下升和由甘受惟君無良亦臣之咎聞諸辛毗牽裾魏后則有禽息竭忠碎首勉思獻替以平可否勿謂無傷自微而彰勿謂何害積小成大事有隱而必見令既出而焉悔鼓鍾在宮聲聞于外浩然涉水朕未有艾將負承以虛心期盡忠而納誨在昔稷契實匡舜禹近茲魏徵佑我文祖君臣協德混一區宇肆予寡昧獲續丕緒臣哉隣哉爾翼爾輔高秋始肅我武惟揚輟此禁衛殿于大邦戀闕方甚嘉言乃昌是規是諫金玉其相辭高理要入德知方總被干虜備于八章宣父有言啓予者商殷有盤銘周有敬器或誠以辭或警以事披圖演義發于爾志與金鏡而高懸將座右而同置人皆有初鮮愼厥終汝其夙夜期保朕躬無曰爾身在外而爾誠不通一言之應千里攸同導彼遐徐達余四聰華夷仰德時乃之功既往既來懷賢忉忉唱子和汝式示深衷尋兼本管及夏綬節度都統加太子少師希全以鹽州地當要害自貞元三年西蕃劫盟之後州城陷虜自

是塞外無保障靈武勢隔西通廊坊甚爲邊患朝議是之九年詔曰
設險守國易象垂文有備無患先王令典況修復舊制安固疆里偃
甲息人必在於此鹽州地當衝要遠介朔陲東達銀夏西援靈武密
邇延慶保扞王畿乃者城池失守制備無據千里庭障烽燧不接三
隅要害役戍其勤若非興集師徒繕修壁壘設攻守之具務耕戰之
坊則封內多虞諸華屢警由中及外皆靡寧居深惟永圖豈忘終食
顧以薄德至化未孚旣不能復前古浹致四夷之守與其臨事而重
擾豈若先備而卽安是用弘久遠之謀修五原之壘使邊城有守中
夏克寧不有暫勞安能永逸宜令左右神策及朔方河中絳邠寧慶
兵馬副元帥渾瑊朔方靈鹽豐夏綏銀節度都統杜希全邠寧節度
使張獻甫神策行營節度使邢君牙銀夏節度使韓潭鄜坊節度使
王栖曜振武節度使范希朝各於所部簡練將士令三萬五千人同
赴鹽州神策將軍張昌宜權知鹽州事應板築雜役取六千人充其
鹽州防秋將士率三年滿更代仍委杜彥先具名奏聞悉與改轉朕

情非已欲志在靖人咨爾將相之臣忠良之士輸誠奉命陳力忘憂
勉茂功勲永安疆場必集兵事實惟衆心各相率勵以副朕志凡役
六千人二旬而畢時將板築仍詔涇原劔南山南諸軍深討吐蕃以牽
制之由是板築之時虜不及犯塞城畢中外稱賀由是靈武銀夏河
西稍安虜不敢深入希全久鎮河西晚節倚邊多恣橫帝嘗寬之豐
州刺史李景略威名出其右希全深忌之疑畏代已乃誣奏景略德
宗不得已爲貶之素病風眩暴戾益甚判官監察御史李起頗忤之
希全又誣奏殺之將吏皆重足脅息貞元十年正月卒廢朝三日贈
司空

尉遲勝本干闥王珪之長子少嗣位天寶中來朝獻名馬美玉玄宗
嘉之妻以宗室女授右威衛將軍毗沙府都督還國與西安節度使
高仙芝同擊破薩毗播仙以功加銀青光祿大夫鴻臚卿改光祿卿
皆同正至德初聞安祿山反勝乃命弟曜行國事自率兵五千赴難
國人畱勝以少女爲質而後行肅宗待之甚厚授特進兼殿中監廣

德中拜驃騎大將軍毗沙府都督于闐王令還國勝固請置宿衛加開府儀同三司封武都王實封百戶勝請以本國王授曜詔從之勝乃於京師修行里盛飾林亭以待賓客好事者多訪之建中末從幸奉天爲兼御史中丞駕在興元勝爲右領軍將軍俄迁右威衛大將軍歷睦王傳貞元初曜遣使上疏稱有國已來代嫡承嗣兄勝旣讓國請傳勝子銳上乃以銳爲檢校光祿卿兼毗沙府長史還固辭且言曰曜久行國事人皆悅服銳生於京華不習國俗不可遣往因授詔王諮議兄弟讓國人多稱之府除以勝爲原王傳卒時年六十四貞元十年贈涼州都督子銳嗣

邢君牙瀛州樂壽人也少從軍於幽薊平盧以戰功歷果毅折衝郎將充平盧兵馬使安祿山反隨平盧節度使侯希逸過海至青徐間田神功之討劉展君牙又從神功戰伐有功歷將軍試光祿卿神功旣爲充鄆節度使令君牙領防秋兵入鎮好畤屬吐蕃陵犯代宗幸陝君牙隸屬禁軍扈從後又以戰功加鴻臚卿累封河間郡公建中

初河北諸節帥叛李晟率禁軍助馬燧等征之晟以君牙爲都虞候累於武安襄國洹水魏縣清豐討賊有功君牙擒生斬級居多屬德宗幸奉天晟率君牙統所部兵倍道兼程來赴國難及駐軍咸陽移營渭橋軍中之事晟惟與君牙商之他人莫可得而聞也收復宮闕驟加御史大夫檢校常侍旣而晟爲鳳翔涇原元帥數出軍巡邊常令君牙掌知留後軍府安悅貞元三年晟以太尉中書令歸朝君牙代爲鳳翔尹鳳翔隴州都防禦觀察使尋迁石神策行營節度鳳翔隴州觀察使加檢校工部尚書吐蕃連歲犯邊君牙且耕且戰以爲守備西戎竟不能爲大患尋加檢校右僕射貞元十四年卒時年七十一廢朝一日贈司空賻布帛米粟有差

楊朝晟字叔明夏州朔方人初在朔方爲部軍前鋒常有功授甘泉果毅建中初從李懷光討劉文喜于涇州斬獲擒生居多授驃騎大將軍稍迁右先鋒兵馬使後李納寇徐州從唐朝臣征討常冠軍鋒以功授開府儀同三司檢校太子賓客上在奉天李懷光自山東赴

難以朝晟爲右廂兵馬使將千余人下咸陽以挫朱泚加御史中丞實封一百五十戶及懷光反於河中朝晟被脅在軍上幸梁洋韓遊瓌退於邠寧懷光以嘗在邠寧迫制如屬城以賊黨張昕在邠州總後務昕懼難作乃大索軍資徵卒乘約明潛發歸于懷光時朝晟父懷賓爲遊瓌將夜後以數十騎斬昕及同謀者遊瓌卽日使懷賓奉表聞奏上召勞問授兼御史中丞正授遊瓌邠寧節度使間諜至河中朝晟聞其事泣告懷光曰父立功于國子合誅戮不可主兵懷光遂繫之及諸軍進圍河中韓遊瓌營于長春宮懷賓身當戰伐及懷光平上念其忠俾副元帥渾瑊特原朝晟用爲遊瓌都虞候時父子同軍皆爲開府賓客御史中丞異姓王榮於軍中後詔徵遊瓌宿衛以張獻甫代之獻甫在道軍中有裴滿者扇亂劫朝晟朝晟陽許之密計斬三百余人獻甫入改御史大夫九年城鹽州徵兵以護外境朝晟統分士馬鎮木波堡獻甫卒詔以朝晟代之其年丁母憂起復左金吾大將軍同正邠州刺史兼御史大夫十三年春朝晟奏方渠

合道木波皆賊路也請城其地以備之詔問湏兵幾何朝晟奏曰臣部下兵自可集事不煩外助復問前築鹽州凡興師七萬今何其易也朝晟曰鹽州之役咸集諸軍番戎盡知之今臣境迫虜若大興兵卽番戎來寇來寇則戰戰則無暇城矣今請密發軍士不十日至塞下未旬而功畢番人始知已無柰何上從之已事軍還至馬嶺吐蕃始來數日而退初軍次方渠無水師旅囂然遽有青蛇乘高而下視其迹水隨而流朝晟命築防環之遂爲淳泉軍人仰飲以足圖其事上聞詔置祠焉免喪加檢校工部尚書是夏以防秋移軍寧州構疾旬余而卒

張敬則者不知何許人本名昌後賜名敬則初助劉玄佐累有軍功官至鳳翔節度使常有復河湟之志遣大將野詩良輔發銳卒至隴西番戎大駭元和二年六月卒

史臣曰有唐中否逆寇勃興天王寤以蒙塵諸侯忠而赴難可孤生居沙漠挺然懷效命之風功冠貔貅屹爾有不矜之色李觀文儒之

胄樂習兵戎戴聖主著定難之勲救渾瑊於會盟之變休顏斬使嬰
城懷光股慄惠元窮蹙自致天子軫悼元諒退兵章敬力戰讓功雅
有器度及不忍小忿專殺庭光請罪軍門壯哉烈士其下諸將鬱有
勞能勝生異域推位讓國堅留宿衛顧慕華風居中土者豈不思廉
讓耶斯乃高祖之基太宗之業貽厥孫謀不徒虛語
贊曰建中失國嘯聚氛慝景五載延羣雄畢力歌鍾甲第珪組繁錫
凡百人臣忠爲令德

唐書列傳卷第九十四

唐律

十一

唐書列傳卷第九十五

劉

聞人詮校刻沈

晦

大等

劉玄佐

子士寧士章士幹

李萬榮附

董晉

陸長源

劉全諒

李忠臣

李希烈

吳少誠

弟少陽少誠子元濟附

劉玄佐本名洽滑州匡城人也少倜儻不理生業爲縣捕盜吏違法爲令所笞僅死乃亡命從軍大厯中爲永平軍衙將李靈曜據汴州洽將兵乘其無備徑入宋州遂詔以州隸永平軍節度使李勉奏署宋州刺史建中二年加兼御史中丞亳穎節度等使李正已死子納匿喪謀叛而李有以徐州歸順納遣兵圍之詔洽與諸軍援有與賊接戰大破之斬首萬餘級由是轉輸路通加御史大夫又收濮州降將楊令暉分兵挾之徇濮陽降其將高彥昭以通濮陽津遷尚書累封四百戶兼曹濮觀察使尋加淄青充鄆招討使又加汴滑都統副使李希烈攻汴州德宗在奉天連戰賊稍卻興元初進加檢校左僕

射加平章事希烈圍寧陵洽大將劉昌言堅守不下希烈攻陳州洽
遣昌言與諸軍救之大敗賊黨獲其將翟崇暉希烈棄汴州洽率軍
收汴宋節度無幾授本管及陳州諸軍行營都統賜名玄佐是歲來
朝又拜涇原四鎮北庭等道兵馬副元帥檢校司空益封八百戶玄佐
性豪侈輕財重義厚賞軍士故百姓益困是以汴之卒始於李忠臣訖
于玄佐而日益驕恣多逐殺將帥以利剽劫又寵任小吏張士南及
養子樂士朝財物鉅萬士朝通玄佐在鎮李納每使來必重贈遺飾
美女名樂從其遊娛故多得其陰事常先爲備故納憚其心計貞元
三年三月薨于位年五十八廢朝三日贈太傅將佐初匿喪稱疾俟代
帝亦爲隱數日乃發喪子士寧士幹初將佐匿喪既發帝遣問所欲
立吳湊可平監軍孟介行軍盧瑗皆曰便及奏次汜水樞將王請備
儀瑗不許又令留什物俟新使將士大怒玄佐子婿及親兵乃以三
月晦夜激怒三軍明晨衙兵皆甲冑擁士寧登重榻衣以墨縗呼為
留後軍士執城將曹金岸浚儀令李邁曰爾等皆請吳湊者遂鬱之

唯盧瑗獲免士寧乃以財物分賜將士請之爲帥孟介以聞帝召宰臣問計竇叅曰今汴人拔李納以邀命若不許俱合於納遂從之授士寧起復金吾衛將軍同正汴州刺史宣武軍節度等使士寧位未定時遣使通王武俊劉濟田緒以士寧未受詔於國皆留之士寧初授節制諸將多不悅服性忍暴淫亂或彎弓挺刃手殺人於桮案間悉烝父之妓妾又強取人之婦女好僕觀婦人每出畋獵數日方還軍府苦之其大將李萬榮與其父玄佐同里閭少相善寬厚得衆心士寧疑之去其兵權令攝汴州事萬榮深怨之將伺其隙逐之十年正月士寧以衆二萬畋於城南兵旣出萬榮晨入士寧廨舍召其所留心腹兵千餘人矯謂之曰有詔徵大夫入朝俾吾掌留務汝輩人賜錢三千貫無他憂也兵士皆拜萬榮旣約親兵於內又召詔客營兵於外以是言令之軍士皆聽命萬榮乃分兵閉城門馳使白士寧曰詔徵大夫宜速即路若迂延不行當傳首以獻士寧知衆不爲用計無所出乃將五百騎走歸京師比至中牟已走大半至東都所餘僅隸

婢妾數十人而已既至京師詔令歸第服喪禁絕出入萬榮乃斬士
寧所親之將卒液白英賢以令於軍凡賞軍士錢二十萬貫詔令籍
沒士寧家財以分賞焉遂授萬榮宣武軍兵馬留後初萬榮遣兵三
千備秋於京西有親兵三百前爲劉士寧所驕者日益橫萬榮惡之
悉置行籍中由是深怨萬榮大將韓惟清張彥琳請將往不許萬榮
令其子迺將之未發惟清彥琳不得志因親兵銜怨乃作亂共攻萬
榮萬榮分兵擊之叛卒兵械少戰不勝乃刼轉運財貨及居人而潰
殺傷千餘人叛兵四出多投宋州刺史劉逸準厚撫之韓惟清走鄭
州張彥琳走東都以束身歸罪宥以不死並流竄焉萬榮悉捕逃叛
將卒妻孥數千人皆誅之萬榮誅叛卒之後人心恟恟不安軍卒數
人呼於市曰今夜大兵四面至城當破衆驚駭萬榮悉捕得或云士
寧所教萬榮斬之以聞遂以士寧廢處郴州十一年五月授萬榮宣
武軍節度使其年八月萬榮病遂署其子迺爲司馬乃勒大將李湛
伊婁浼張任往外鎮尋皆令殺之浼任皆已死惟李湛至尉氏尉氏

鎮郝忠節不肯殺甚是夜軍士逐出李迺遂執送京師萬策以其日病卒迺至京師付京兆府杖殺劉士幹玄佐養子前爲太府少卿有樂士朝者亦爲玄佐養子因冒劉姓與士幹有隙及玄佐卒或云爲士朝所酖士幹知之及至京師遣奴持刀於喪位語士朝曰有吊客至因誘殺之賜士幹死

董晉字混成河中盧鄉人明經及第至德初肅宗自靈武幸彭原晉上書謁見授校書郎翰林待制再轉衛尉丞出爲汾州司馬未幾刺史崔圓改淮南節度奏晉以本官攝殿中侍御史充判官尋歸臺授本官遷侍御史主客員外郎祠部郎中大曆中兵部侍郎李涵送崇徽公主使迴紇奏晉爲判官使還拜司勳郎中歷秘書太府太常少卿監左金吾將軍旬日德宗嗣位改太常卿遷右散騎常侍兼御史中丞知臺事以清勤謹慎故驟遷右職尋爲華州刺史兼御史中丞潼關防禦使又之加兼御史大夫朱泚僭逆於京邑使兇黨仇敬何望之侵逼華州晉奔遁赴行在授國子祭酒尋令往恒州宣慰從車

駕還京師遷左金吾衛大將軍改尚書左丞時右丞元琇領度支使
爲韓滉所擠貶黜晉嫉之見宰相極言非罪舉朝稱之復拜太常卿
五年遷門下侍郎同平章事時政事決在竇叅晉但奉詔書領然諾而
已金吾衛將軍沈房有第喪公除不衣慘服入閣上問宰相對曰準
式朝官有周年已下喪者諸絕縵不合衣淺色帝曰南班安得有之
對曰因循而然又問晉冠冕之制對曰古人服冠冕者動有佩玉之
響所以節步也禮云堂上接武堂下布武至恭也步武有常君前之
禮進趨而已今或奔走以致顛仆非恭慎也在式朝官皆是綾袍襖
五品已上金玉帶取其文彩畫飭以奉上也是禹惡衣食而致美乎
黻冕君親一致昔尚書郎含香萊萊衫服皆此義也服絕縵非制也
上深然之遂詔曰常叅官入閣不得趨走周替已下喪者禁慘服朝
會又令服本品綾袍金玉帶晉明於禮學如此竇叅驕滿旣甚帝漸
惡之八年叅諷晉奏其弟給事中竇申爲吏部侍郎帝正色曰豈不
是竇叅遣卿奏也晉不敢隱因問叅過失晉具奏之旬日叅貶官晉

憂懼累上表辭位九年夏改禮部尚書兵部尚書東都留守東都畿
汝州都防禦使會汴州節度李萬榮疾甚其子迺爲亂以晉爲檢校
左僕射同平章事兼汴州刺史宣武軍節度營田汴宋觀察使晉旣
受命唯將幕官僚從等十數人都不召集兵馬旣至鄭州宣武軍迎
候將吏無至者晉左右及鄭州官吏皆懼共勸晉云鄧惟恭承萬榮
疾病之甚遂摠領軍州事今相公到此尚不使人迎候其情狀豈可
料即恐須且遲迴以候事勢晉曰奉詔爲汴州節度使即合準勅赴
官何可妄爲逗留人皆憂其不測晉獨恬然未至汴州十數里鄧惟
恭方來迎候晉俾其不下馬旣入乃委惟恭以軍政衆服晉明於事
體機變而未測其深淺物萬榮逐劉士寧代爲節度使委兵於惟恭
以其同鄉里及疾甚李迺將爲亂惟恭乃與監軍同謀縛迺送歸朝
廷惟恭自以當便代居其位故不遣候吏以疑懼晉心異其不敢進
不意晉之速至晉已近方遽出迎之然心常快快竟以驕盈慢法潛
圖不軌配流嶺南朝廷恐晉柔懦尋以汝州刺史陸長源爲晉行軍

司馬晉謙恭簡儉每事因循多可故亂兵粗安長源好更張云爲數請改易舊事務從削刻晉初皆然之及案牘已成晉乃命且罷又委錢穀支計初判官孟叔度輕佻好慢易軍人皆惡之晉十五年二月卒年七十六廢朝三日贈太傅賜布帛有差卒後未十日汴州大亂殺長源叔度等

陸長源字沐之開元天寶中尚書左丞太子詹事餘慶之孫西河太常璪之子長源淑書史乾元中陷河北諸賊因爲昭義軍節度薛嵩卒後父之歷建信二州刺史浙西節度韓滉兼領江淮轉運奏長源檢校郎中兼中丞充轉運副使罷爲都官郎中改萬年縣令出爲汝州刺史貞元十二年授檢校禮部尚書宣武軍行軍司馬汴州政事皆決斷之性輕佻言論容易恃才傲物所在人畏而惡之及至汴州欲以峻法繩驕兵而董晉判官楊凝孟叔度亦縱恣淫酒衆情共怒晉性寬緩事務因循以收士心長源每事守法晉或苟且長源輒執而正之及晉卒令長源知留後事長源揚言曰將士多弛慢不守憲章

當以法繩之由是人人恐懼加以叔度奇刻多縱聲色數至樂營與諸婦人嬉戲自稱孟郎衆皆薄之舊例使長薨放散布帛於三軍制服至是人請服長源初固不允軍人求之不已長源等議給其布直叔度高其鹽價而賤爲布直每人不過得鹽三二觔軍情大變或勸長源故事有大變皆賞三軍三軍乃安長源曰不可使我同河北賊以錢買健兒取旌節兵士怨怒滋甚乃執長源及叔度等齎而食之斯湏骨肉糜散長源死之日詔下以爲節度使及聞其死中外惜之贈尚書右僕射

劉全諒懷州武涉人也父客奴由征行家於幽州之昌平少有武藝從平盧軍開元中有室韋首領段普恪恃驍勇數苦邊節度使薛楚玉以客奴有膽氣令抗普恪客奴單騎襲之斬首以獻自白身授左驍衛將軍充遊弈使自是數有戰功性忠謹爲軍人所信天寶末安祿山反詔以安西節度封常清爲范陽節度以平盧節度副使呂知誨爲平盧節度以太原尹王承業爲河東節度祿山旣僭位於東都

遣腹心韓朝陽等招誘知誨知誨遂受逆命誘殺安東副都護保定軍使馬靈營祿山遂署知誨爲平盧節度使客奴與平盧諸將同議取知誨殺之仍遣與安東將王玄志遙相應援馳以奏聞十五載四月授客奴柳城郡太守攝御史大夫平盧節度支度營田陸運押兩蕃渤海墨水四府經畧及平盧軍使仍賜名正臣又以王玄志爲安東副大都護攝御史中丞保定軍及營田使正臣仍領兵平盧來襲范陽未至爲逆賊將史思明等大敗之正臣奔歸爲王玄志所醜而卒逆賊署徐歸道餽王玄志與平盧將侯希逸等又襲殺歸道大曆九年追贈正臣工部尚書全諒本名逸準以父勲授別駕長史建中初劉玄佐爲宋亳節度使召署爲牙將以勇果騎射聞玄佐以宗姪厚遇之累署都知兵馬使試太僕卿兼御史中丞玄佐卒子士寧代爲節度使疑宋州刺史翟良佐不附已陽言出巡至宋州遽以逸準代良佐爲刺史及董晉卒兵亂殺陸長源監軍貝文珍與大將密召逸準赴汴州令知番後朝廷因授以檢校工部尚書汴州刺史兼

宣武軍節度觀察等使仍賜名全諒貞元十五年二月卒年四十九廢朝一日贈右僕射

李忠臣本姓董名秦平廬人也世家于幽州薊縣自云曾祖文昱棣州刺史祖玄燮安東都護府錄事叅軍父神嶠河內府折衝忠臣少從軍在卒伍之中材力冠異事幽州節度薛楚玉張守珪安祿山等頗委征計積勞至折衝即將將軍同正平廬軍先鋒使及祿山反與其倫董密議殺偽節度呂知謫劉正臣爲節度以忠臣爲兵馬使攻長楊戰獨山襲榆關北平殺賊將申子貢榮先欽擒周釗送京師忠臣功多又從正臣破漁陽逆將李歸仁李咸白秀芝等來拒戰約數十合並摧破之無何潼關失守郭子儀李光弼退師忠臣乃引軍北歸奚王阿篤孤初以衆與正臣合後詐言請以萬餘騎同收范陽至后城南中夜反攻忠臣與戰遂至溫泉出破之擒大首領阿布離斬以祭纛鼙鼓正臣卒又與衆議以安東都護王玄志爲節度使至德二載正月玄志令忠臣以步卒三千自雍奴爲輦筏過海賊將帝庭

鵝洽來拒忠臣與董竭忠退之轉戰累日遂收魯城河間景城等大獲資糧以赴本軍復與大將田神功率兵討平原樂安郡下之擒偽刺史臧瑜等防河招討使李銑承制以忠臣爲德州刺史屬史思明歸順河南節度張鎬令忠臣以兵赴鄆州與諸軍使收河南州縣又與裨將陽惠元大破賊將王福德于舒舍口肅宗累下詔慰諭仍令鎮濮州尋移韋城乾元元年九月改光祿卿同正其年與郭子儀等九節度圍安慶緒於相州明年二月諸軍潰歸忠臣亦退至滎陽賊將敬釭來襲官船忠臣大破之獲米二百餘艘以資汴州軍士尋拜濮州刺史緣河守捉使移鎮杏園渡及史思明陷汴州節度使許叔冀與忠臣並力屈降賊思明撫忠臣背曰吾比祇有左手今得公兼有右手矣與俱寇河陽數日忠臣夜以五百人斫其營突圍歸李光弼以聞詔加開府儀同三司殿中監同正賜實封二百戶召至京師賜姓李氏名忠臣封隴西郡公賜良馬莊宅銀器綵物等時陝西神策兩節度郭英乂衛伯玉鎮陝州以忠臣爲兩軍節度兵馬使魚朝

恩亦在陝俾忠臣與賊將李歸仁李感恩等戰於永寧沙柵前後數十陣皆摧破之會淮西節度王仲昇為賊所擒宝應元年七月拜忠臣太常卿同正兼御史中丞淮十一州節度尋加安州刺史仍鎮蔡州其年令忠臣會元帥諸軍收復東都二年六月就加御史大夫時迴紇可汗既歸其國留判官安恪石帝庭於河陽守禦財物因此招聚亡命為寇道路壅隔詔忠臣討平之永泰元年吐蕃犯西陲京師戒嚴代宗命中使追兵諸道多不時赴難使至淮西忠臣方會鞠即令整師飾駕監軍大將固請曰軍行須擇日吉忠臣奮臂於衆曰焉有父母遇寇難待揀好日方救患乎即日進發自此方隅有警忠臣必先期而至由是代宗嘉其忠節加本道觀察使寵賜頗厚及同華節度周智光舉兵反詔忠臣與神策將李太清等討平之大曆二年加檢校工部尚書實封通前三百五年加蔡州刺史七年檢校右僕射知省事李靈曜之叛田承嗣使姪悅援之忠臣與諸軍大破悅等汴州平十一年十二月加檢校司空平章事汴州刺史忠臣性貪殘

好色將吏妻女多被誘脅以通之又軍無紀綱所至縱暴人不堪命而以妹壻張惠光爲衙將恃勢兇虐軍中苦之數有言於忠臣不之信也俄以惠光爲節度副使令惠光子爲衙將陵橫甚於其父忠臣所信任大將李希烈素善騎射群情所伏因衆心之怒以十四年三月與少將丁暉賈子華監軍判官蔣知璋等舉兵斬惠光父子以脅逐忠臣單騎赴京師朝廷方寵武臣不之責也依前檢校司空平章事留京師奉朝請建中初嘗因奏對德宗謂之曰卿耳甚大真貴人也忠臣對曰臣聞驢耳甚大龍耳甚小臣耳雖大乃驢耳也上說之時常侍張涉承恩用事坐受財賄事露帝將以法繩之涉即帝在春宮時侍講也忠臣奏曰陛下貴爲天子而先生以乏財抵法以愚臣觀之非先生之過也帝意解但令歸田里前湖南觀察辛京杲嘗以忿怒杖殺部曲有司劾奏京杲殺人當死從之忠臣奏曰京杲合死久矣上問之對曰渠伯叔某於某處戰死兄弟某於某處戰死渠嘗從行獨不死是以知渠合死久矣上亦憫然不令加罪改授王傅而

已忠臣本強率直不識書不喜儒生及罷兵權官位崇重常鬱鬱不得志及朱泚反以爲僞司空兼侍中泚率兵逼奉天命忠臣京城留守泚敗忠臣走樊川別業李晟下將士擒忠臣至繫之有司興元元年并其子並誅斬之時年六十九籍沒其家

李希烈遼西人父大定希烈少從平盧軍後隨李忠臣過海至河南寶應初忠臣爲淮西節度署希烈爲偏裨累授將軍試光祿卿殿中監忠臣兼領汴州希烈爲左廂都虞候加開府儀同三司大曆末忠臣軍政不脩事多委妹婿張惠光爲押衙弄權縱恣人怨與少將丁勣等斬惠光父子忠臣奔赴朝廷詔以忻王爲淮西節度副大使授希烈蔡州刺史兼御史中丞淮西節度留後令滑亳節度李勉兼領汴州德宗即位後月餘加御史大夫充淮西節度支度營田觀察使又改淮西節度淮寧軍以寵之建中元年又加檢校禮部尚書會山南東道節度梁崇義拒捍朝命迫脅使臣二年六月詔諸軍節度率兵討之加希烈南平郡王兼漢北都知諸兵馬招撫處置使希烈破崇義

衆遂討平之錄希烈功加檢校右僕射同平章事賜實封五百戶淄青節度李正已又謀不軌三年秋加希烈檢校司空兼淄青兗鄆登萊齊等州節度支度營田新羅渤海兩蕃使令計襲正已希烈遂率所部三萬人移居許州聲言遣使往青州招諭李納其實潛與交通又移牒汴州令備供擬將與納同爲亂李勉以其道路合自陳留乃除道具饌以待之希烈不從乃大慢罵自是志意縱肆言多悖慢日遣使交通河北諸賊帥等是歲長至日朱滔田悅王武俊李納各僭稱王滔使至希烈希烈亦僭稱建興王天下都元帥四年希烈遣其將襲陷汝州執李元平而去東都大擾亂朝廷猶爲含容遣太子太師顏真卿往宣慰真卿發後數日以龍武將軍哥舒曜爲東都兼汝州行營兵馬節度希烈既見真卿但肆兇言令左右慢罵指斥朝廷又遣逆黨董待名韓霜露劉敬宗陳質翟暉等四人伺外侵抄州縣官軍皆爲其所敗荆南節度張伯儀全軍覆沒又令周曾王玢姚憺呂從賁康琳等來襲曜曾玢憺等謀迴軍據蔡州襲討希烈事洩並

遇害神策軍使白志真又獻策謀令嘗爲節度都團練使者各出家
僮部曲一人及馬令劉信揔之以討希烈尋詔李勉爲淮西招討使
哥舒曜爲副至四月曜率衆屯襄城頻與賊戰皆不勝八月希烈率
衆二萬圍襄城李勉又令將唐漢臣率兵與劉德信同爲曜之影援
皆望風敗郛希烈兇逆旣甚帝乃命舒王爲荊襄江西沔鄂等道節
度諸軍行營兵馬都元帥大開幕府文武僚屬之盛前後出師未有
其比又令涇原諸道出兵皆赴襄城軍未發會涇州兵亂車駕幸奉
天其日希烈大破曜軍於襄城曜遁歸東都賊因乘勝攻陷汴州李
勉奔歸宋州希烈性慘毒酷每對戰陣殺人流血盈前而言笑飲饌
自若以此人畏而服從其教令盡其死力其攻汴州驅百姓令運木
土築壘道又怒其未就乃驅以填之謂之涇梢旣入汴州於是僭號
曰武成以孫廣鄭賁李愬元平爲宰相以汴州爲大梁府李清虛爲
尹署百官遣兵東討至寧陵竟爲劉洽所拒不得前又遣將程暉率
精卒襲陳州爲劉洽李納大破之生擒暉以獻諸軍乘勝進攻汴州

希烈遁歸蔡州擒其僞署將相鄭賁劉敬宗等李臯樊澤曲環張建封又四面討襲之累拔其郡縣希烈敗衄貞元二年三月因食牛肉遇疾其將陳仙奇令醫人陳仙甫置藥以毒之而死妻男骨肉兄弟共一十七人並誅之初希烈於唐州得象一頭以爲瑞應又上蔡襄城獲其珍寶乃是爛車缸及滑石僞印也陳仙奇者起於行間性忠果自希烈死朝廷授淮西節度頗竭誠節未幾爲別將吳少誠所殺贈太子太保賻布帛米粟有差喪事官給

吳少誠幽州路縣人父爲魏博節度都虞候少誠以父勲授一子官釋褐王府戶曹後至荆南節度使庾準奇之留爲衙門將準入覲從至襄漢見梁崇義不留憲度知有異志少誠密計有成擒之畧將自陳於闕下屬李希烈初授節制銳意立功見少誠計慮乃以少誠所見錄奏有詔慰飭不次封通義郡王未幾崇義違命希烈受制專征以少誠爲前鋒崇義平賜實封五千戶後希烈叛少誠頗爲其用希烈死少誠等初推陳仙奇統戎事朝廷已命仙奇尋爲少誠所殺衆

推少誠知留務朝廷遂授以申光蔡等州節度觀察兵馬留後尋正授節度少誠善為治勤儉無私軻完聚不奉朝廷貞元三年判官鄭常及大將楊冀謀逐少誠以聽命於朝試校書郎劉涉假為手詔數十潛致於大將欲因少誠之出閉城門以拒之屬少誠將出餞中使常冀等遂謀舉事臨發為人所告常冀先遇害其將李嘉節等各持假詔請罪少誠悉宥之其大將宋吳曹齊奔歸京師十五年陳許節度曲環卒少誠擅出兵攻掠臨潁縣節度留後上官浚遣兵赴救臨潁鎮使常清與少誠通救兵三千餘人悉擒縛而去九月遂圍許州尋下詔削奪少誠官爵分遣十六道兵馬進討十二月官軍敗斬於小潁河明年正月夏州節度使韓全義為淮蔡招討處置使北路行營諸軍將士並取全義指揮陳許節度留後上官浚克副使五月全義與少誠將吳秀吳少陽等戰於潁水南官軍復敗七月全義頓軍於五樓行營為賊所乘大潰全義與都監軍使賈秀英賈國良等夜遁遂城守潁水汴宋徐泗淄青兵馬直趣陳州列營四面少誠兵逼潁

水五六里下營韓全義諸軍又退保陳州其汴州河陽等兵各私歸
本道陳許將孟元陽與神策兵各率所部留軍澱水全義斬昭義滑
州河陽河中都將凡四人然竟未嘗整陣交鋒而王師累挫潰少誠
尋引兵退歸蔡州遂下詔洗雪復其官爵累加檢校僕射順宗即位
加同中書門下平章事元和初遷檢校司空依前平章事元和四年
十一月卒年六十廢朝三日贈司徒

吳少陽本滄州清池人初吳少誠父翔在魏博軍中與少陽相愛及
少誠知淮西留守乃厚以金帛取少陽至則名以堂弟署爲軍職累
奏官爵出入少誠家情言甚暱少陽度少誠猜忍懼爲所害乃請出
外以任防捍之任少誠乃表爲申州刺史兼御史大夫凡五年少陽
頗寬易而少誠之衆悅附焉及少誠病亟家僮單于熊兒者僞以少
誠意取少陽至時少誠已不知人乃僞署少陽攝副使知軍州事少
誠子元慶年二十餘先爲軍職兼御史中丞少陽密害之及少誠死
少陽自爲留後時王承宗求繼士真不受詔德宗怒以討承宗不欲兵

連兩河乃詔遂王宥選領彰義軍節度大使以少陽爲留後遂授彰義軍節度使檢校工部尚書少陽據蔡州凡五年不朝覲汝南多廣野大澤得豢馬畜時奪掠壽州茶山之利內則數匿亡命以富實其軍又屢以牧馬來獻詔因善之元和九年九月卒贈右僕射

吳元齊少陽長子也初爲試協律郎兼監察御史攝蔡州刺史及父死不發喪以病聞因假爲少陽表請元齊主兵務帝遣醫工候之即稱少陽疾愈不見而還先是少陽判官蘇兆楊元卿及其將侯惟清嘗同爲少陽畫朝覲計及元齊自領軍兇狠無義唯暱軍中兇悍之徒素不便兆縊殺之歸其屍於家械侯惟清而囚之時朝廷誤聞惟清已死贈兵部尚書贈蘇兆以右僕射楊元卿先奏事在京師得盡言經畧淮西事於宰相李吉甫始少陽以病聞元卿請凡淮西使在道路者所在留止之及少陽卒凡四十日不爲輟朝但易將加兵於外以待其邸吏無何安傳董重質已殺元齊并屠其家李吉甫遽請對拜賀乃輟朝數日知元齊尚在時賊陰計已成群衆四出狂悖而

不可遏屠舞陽焚葉縣攻掠魯山襄城汝州許州及反陽翟人多逃
伏山谷荆棘間爲其殺傷驅剽者千里關東大恐十月以陳州刺史
李光顏爲忠武軍節度使又以山南東道節度使嚴綬充申光蔡等
州招撫使仍令內常侍崔潭峻監綬軍十年正月綬軍臨賊西境詔
曰吳元濟逆絕人理反易天常不居父喪擅領軍政諭以詔旨曾無
謙恭熒惑一方之人迫脅三軍之衆以少陽嘗經任使爲之軫悼命
申吊祭臨遣使臣陵虐封疆遂致稽阻絕朝廷之理忘父子之恩旋
又掩寇舞陽傷殘吏卒焚燒葉縣搔擾間恣行殺戮無所畏忌朕
念賞延之義重傷藩帥之門尚欲納於忠順之途處在顯榮之地未
能飭怒猶爲包荒再降詔書俾申招撫而毒螫滋甚姦心靡俊壽春
西南又陷鎮柵窮兇稔惡縱暴延災覆載之所不容人神之所共棄
良非獲已致此典戎吳元濟在身官爵並宜令削奪令宣武大寧淮
南宣歙等道兵馬合勢山南東道及魏博荆南江西劍南東川兵馬
與鄂岳許會東都防禦使與懷鄭汝節度及義成兵馬犄角相應同

期進計二月綬兵爲賊所襲敗于磁丘退保唐州四月光顏破賊黨
元濟遣人求援于鎮州王承宗淄鄆李師道二帥上表于鎮州請赦
元濟之罪朝旨不從自是兩河賊帥所在竊發異以沮撓王師五月
承宗師道遣盜燒河陰倉詔御史中丞裴度於軍前宣諭觀用兵形
勢度還奏曰臣觀諸將唯光顏勇義盡心必有成功上意甚悅翌日
光顏奏大破賊於時曲上曰度知光顏可謂至矣乃以度兼刑部侍
郎自是中外相賀決不赦賊徵天下兵環申蔡之郊大小十餘鎮六
月承宗師道遣盜伏於京城殺宰相武元衡中丞裴度衡先死度重
傷而免憲宗特怒即命度爲宰相准右用兵之事一以委之七月李
師道遣嵩山僧圓爭結山賊與留邸兵欲焚燒東都先事敗而禍弭
嚴綬退罷乃以汴州節度使韓弘爲淮右行營兵馬都統以高霞寓
有名用爲唐鄧節度十一年春諸軍雲合惟李光顏懷汝節度烏重
胤心無顧望旦夕血戰繼獻戎捷六月高霞寓爲賊所擊敗于鉄城
退保新興柵時諸軍勝負皆不實聞多虛稱克捷及霞寓敗中外恟

凶宰相諫官屢以罷兵爲請唯裴度堅於破賊尋以袁滋代霞寓爲唐鄧帥滋柔儒不能軍十二年正月袁滋復貶閑廐使李愬表請軍前自効乃用愬爲唐鄧帥以代滋愬軍壓境拔賊文城柵擒柵將吳秀琳又獲賊將李祐李光顏亦拔賊圍城元濟始惧盡發左右及守城卒屬董重質以抗光顏重胤六月元濟乞降爲群賊所制不能自拔上以元兇已蹙兵未臨於賊城輒饋日殫因延英問計於宰相裴度曰賊力已困但群帥不一故未能決降上曰卿決能行乎曰臣誓不與賊偕全七月詔以度爲彰義軍節度使兼申光蔡四面行營招撫使以鄆城爲行在蔡州爲歸所八月度至鄆城激勵士衆軍士喜度至以賞罰必行皆願輸釐每出勞軍士有流涕者時李愬營文城柵旣得吳秀琳李祐知其可用委信無疑日夜與計事於帳中祐曰元濟勁軍多在洄曲西境防捍而守蔡者皆市人疲耄之卒可以乘虛掩襲直抵懸瓠比賊將聞之元濟成擒矣愬然之咨於裴度度曰兵非出奇不勝常侍良圖也十一月愬夜出軍令李祐率勁騎三千爲

前鋒田進誠三千爲後軍想自率三千爲中軍其月十日夜至蔡州城下坎墻而畢登賊不之覺十一日攻衙城擒元濟并其家屬以聞初元濟之叛恃其兇狠然治軍無紀綱其將趙昌洪凌朝江董重質等各權兵外寇李師道鄆州之鹽城往來寧陵雍丘之間韓弘知而不禁淮右自少誠阻兵已來三十餘年王師加討未嘗及其城下常走韓全義敗于頓故驕悍無所顧忌且恃城池重固有陂浸阻廻故以天下兵環攻三年所尅者一縣而已及黜高霞寓李遜素滋諸軍始進又得陰山府沙陀驍騎卽鄆勇卒光顏重胤之奮命及丞相臨統破諸將首尾之計方擒元惡申蔡之始人刼於希烈少誠之虐法而忘其所歸數十年之後長者衰喪而壯者安於毒暴而恬於搏噬地既少馬而廣畜騾乘之教戰謂之騾子軍尤稱勇悍而甲仗皆盡爲雷公星文以爲厭勝而少誠能以姦謀固衆心初韓全義敗於潞水蔡其于全義帳中得公卿間問訊書少誠束而諭衆曰朝廷公卿以此書託全義收蔡州日乞一將士妻女以爲婢妾以此激怒其衆絕

其歸向之心是以蔡人有老死不聞天子恩宥者故堅爲賊用地雖中州人心過于夷貊乃至搜閱天下豪銳三年而後屈者彼非將才而力備蓋勢驅性習不知教義之所致也元濟至京憲宗御興安門受俘百寮樓前稱賀乃獻廟社狗于兩京斬之於獨柳時年三十五其夜失其首妻沈氏没入掖庭第二人子三人流於江陵誅之判官劉協庶七人皆斬光蔡等州平始復爲王土矣

史臣曰治亂勢也勢亂不能卒治長源以法繩驕軍禍不旋踵則董公之寬柔不無謂古之名將以陰謀怨望鮮全其族者董秦始奮忠義多長者言宜其顯赫及失意挾邪俄被淮陰之戮惜哉吳少誠爲希烈之亂胎雖謀奪其軍及嗣而滅而元濟効希烈之狂悖謂無天地人之兇險一至於斯是知王者御治之道其可忽諸

贊曰聖哲之君慎名與器不軌之臣得寵則戾董怨而族吳悖而道好亂樂禍可監前車

唐書列傳卷第九十六

劉

同

修

聞人詮校妹就同校

薛播

鮑防

李自良

李說

嚴綬

蕭昕

杜亞

王緯

李若初

于頔

盧徵

楊憑

鄭元

杜兼

裴玢

薛伾

薛播河中寶鼎人中書舍人文思曾孫也父元暉什邡令以播贈工部郎中播天寶中舉進士補校書郎累授萬年縣丞武功令殿中侍御史刑部員外郎萬年令播溫敏善與人交李栖筠常袞崔祐甫皆引擢之及祐甫輔政用爲中書舍人出汝州刺史以公事貶泉州刺史尋除晉州刺史河南尹遷尚書左丞轉禮部侍郎遇疾貞元三年卒贈禮部尚書初播伯父元曖終於隰城丞其妻濟南林氏丹陽太守洋之妹有母儀令德博涉五經善屬文所爲篇章時人多諷詠之

元曖卒後其子彥輔彥國彥偉彥雲及播兄據摠並早孤幼悉爲林氏所訓導以至成立咸致文學之名開元天寶中二十年間彥輔據等七人並舉進士連中科名衣冠榮之

鮑防襄州人幼孤貧篤志好學善屬文天寶末舉進士爲浙東觀察使薛兼訓從事累至殿中侍御史入爲職方員外郎改太原少尹正拜節度使入爲御史大夫歷福建江西觀察使徵拜左散騎常侍扈從奉天除禮部侍郎尋遷工部尚書致仕防歷洪福京兆皆有政聲唯總戎非所宜而謬執兵柄以太原革車胡騎雄雜而迴鶻深入寇防出拒戰爲虜所敗爲禮部侍郎時嘗遇知雜侍御史竇參於通衢導騎不時引避僕人爲參所鞭及參秉政遽令致仕防謂親友曰吾與蕭昕之子齒而與昕同日縣車非朽邁之致以餘忿見廢防文學舊人歷職中外不因罪戾而爲俗吏所擯竟以憤終衆頗憫防而咎參故參之敗不旋踵非不幸也

李自良兖州泗水人初祿山之亂自良從兖鄆節度使能元皓以戰

功累授右衛率後從袁係討袁晃陳莊賊積功至試殿中監隸浙江東道節度使薛兼訓兼訓移鎮太原自良從行授河東軍節度押衙兼訓卒鮑防代又事防爲牙將會迴鶻入寇防令大將焦伯瑜杜榮國將兵擊之自良謂防曰迴鶻遠來求戰未可與爭鋒但於歸路築二壘以兵守之堅壁不動虜求戰不得師老自旋俟其返旆即乘之縱不甚捷虜必狼狽矣二壘阨其歸路策之上也防不從促伯瑜等逆戰遇虜於百井伯瑜等大敗而還由是稍知名馬燧代防爲帥署奏自良代州刺史兼御史大夫仍爲軍候自良勤恪有謀燧深委信之建中年田悅叛燧與抱真東討自良常爲河東大將摧鋒陷陣破田悅及討李懷光於河中自良專河東軍都將前後戰績居多燧之立功名由自良協助之力也貞元三年從燧入朝罷燧兵權德宗欲以自良代燧自良懇辭事燧久不欲代爲軍帥物議多之乃授右龍武大將軍德宗以河東密邇胡戎難於擇帥翌日自良謝上謂之曰卿於馬燧存軍中事分誠爲得禮然北門之寄無易於卿即日拜檢

校工部尚書兼御史大夫太原尹北都留守河東節度支度營田觀察使在鎮九年以簡儉守職軍民胥悅雖出身戎伍動必循法略不以暴戾加人十一年五月卒於軍年六十三上甚嗟惜之廢朝一日贈左僕射賻布帛米粟有差

李說淮安王神通之裔也父遇天寶中爲御史中丞說以門蔭歷仕累佐使幕馬燧爲河陽三城太原節度皆辟爲從事累轉御史郎官御史中丞太原少尹出爲汾州刺史節度使李自良復奏爲太原少尹檢校庶子兼中丞貞元十一年五月自良病凡六日而卒匿喪陽言病甚數日發喪先是都虞候張瑤久在軍素得士心嘗請假遷葬自良未許至是說與監軍王定遠謀乃給瑤假以大將毛朝陽代瑤然後遣使告自良病中使第五國珍自雲朔使還過太原聞自良病中使遲留信宿自良卒國珍急馳至京先說使至乃下制以通王領河東節度大使以說爲行軍司馬充節度留後北都副留守仍令國珍齎說官告及軍府將吏部內刺史等勅書三十餘通往太原宣賜

軍中始定定遠恃立說之功頗恣縱橫軍政皆自專決仍請賜印監軍有印自定遠始也定遠既得印益暴將吏輒自補授說寢不歡遂成嫌隙是歲七月定遠署盧侯田宏爲列將以代彭令茵令茵不伏楊言曰超補列將非功不可宏有何功敢代予任定遠聞而含怒召令茵斬之埋於馬糞之中家人請尸不與三軍皆怨說具以事聞德宗以定遠有奉天扈從之功恕死停任制未至定遠怒說奏聞趨府謀殺說昇堂未坐抽刀刺說說走而獲免定遠馳至府門召集將吏於箱中陳勅牒官告二十餘軸示諸將曰有勅令李景略知留後遣說赴京公等皆有恩命指箱中示之諸將方拜扑大將馬良輔呼而麾衆曰箱中皆監軍舊官告非恩命也不可授但備急變爾定遠知事敗走登乾陽樓召其部下將卒多不之應比夜定遠墜城下槎枿傷而不死尋有詔削奪長流崖州大將高迪等同其謀說皆斬之尋正拜河東節度使檢校禮部尚書說在鎮六年初勤心吏職後遇疾言語行步蹇澁不能錄軍府之政悉監軍主之又爲孔目吏宋季等

欺誑軍政事多墮紊如此累年十六年十月卒年六十一廢朝一日
贈左僕射是月制以河東節度行軍司馬鄭儋檢校工部尚書兼太
原尹御史大夫河東節度度支營田觀察等使北都留守在任不替
年而卒

嚴綬蜀人曾祖方約利州司功祖挹之符離尉父丹殿中侍御史綬
大曆中登進士第累佐使府貞元中由侍御史充宣歙團練副使深
爲其使劉蕡委遇政事多所咨訪十二年蕡卒綬掌宣歙留務傾府
藏以進獻由是有恩召爲尚書刑部員外郎天下賓佐進獻自綬始
也未幾河東節度使李說嬰疾事多曠弛行軍司馬鄭儋代綜軍政
旣而說卒因授儋河東節度使是時姑息四方諸侯未嘗特命帥守
物故即用行軍司馬爲帥畀軍情狀伏儋旣爲帥德宗選朝士可以
代儋爲行軍司馬者因綬前日進獻上頗記之故命檢校司封郎中
充河東行軍司馬不周歲儋卒遷綬銀青光祿大夫檢校工部尚書
兼太原尹御史大夫北都留守充河東節度支度營田觀察處置等

使元和元年楊惠琳叛於夏州劉闢叛於成都綬表請出師討伐綬
悉選精甲付牙將李光顏兄弟光顏累立戰功蜀夏平加綬檢校尚
書左僕射尋拜司空進階金紫封扶風郡公綬在鎮九年以寬惠爲
政士馬蕃息境內稱治四年入拜尚書右僕射綬雖名家子爲吏有
方略然銳於勢利不存名節人士以此薄之嘗預百寮廊下會上令
中使馬江朝賜櫻桃綬居兩班之首在方鎮時識江朝敘語次不覺
屈膝而拜江朝拜御史大夫高郢亦從而拜是日爲御史所劾綬待
罪于朝命釋之翌日責江朝降官一等尋出鎮荆南進封鄭國公有
敘州蠻首張伯靖者殺長吏據辰錦等州連九洞以自固詔綬出兵
討之綬遣部將李忠烈齎書曉諭盡招降之九年吳元濟叛朝議加
兵以綬有弘恕之稱可委以戎柄乃授山南東道節度使尋加淮西
招撫使綬自帥師墜賊境無威略以制寇到軍日遽發公藏以賞士
卒累年蓄積一旦而盡又厚賂中貴人以招聲援師徒萬餘閉壁而
已經年無尺寸功裴度見上屢言綬非將帥之才不可責以戎事乃

拜太子少保代歸尋檢校司空久之進位太傅封至三千戶長慶二年五月卒年七十七詔贈太保綬材器不踰常品事兄嫂過謹爲時所稱常以寬柔自持位躋上公年至大耋前後統臨三鎮皆號雄藩所辟士親睹爲將相者凡九人其貴壽如此

蕭昕河南人少補崇文進士開元十九年首舉博學宏辭授陽武縣主簿天寶初復舉宏辭授壽安尉再遷左拾遺昕嘗與布衣張鎬友善館而禮之表薦之曰如鎬者用之則爲王者師不用則幽谷一叟爾玄宗擢鎬拾遺不數年出入將相及安祿山反昕舉贊善大夫來瑱堪任將帥思明之亂瑒功居多累遷憲部員外郎爲副元帥哥舒翰掌書記潼關敗間道入蜀遷司門郎中尋兼安陸長史爲河南等道都統判官遷中書舍人兼楊府司馬佐軍仍舊入拜本官累遷秘書監代宗幸陝昕出武關詣行在轉國子祭酒大曆初持節弔迴鶻時迴鶻詰昕曰祿山思明之亂非我無以平定唐國柰何市馬而失信不時歸價衆皆失色昕荅曰國家自平寇難賞功無絲毫之遺况

隣國乎且僕固懷恩我之叛臣乃者爾助爲亂聯西戎而犯郊畿及吐蕃敗走迴紇悔懼啓願乞和非大唐存念舊功則當匹馬不得出塞矣是迴紇自絕非我失信迴紇慙退加禮以歸爲常侍十二年朱泚之亂徒步出城泚急求之亡竄山谷間至奉天遷太子少傅貞元初兼禮部尚書尋復知貢舉五年致仕七年卒于家年九十廢朝謚曰懿

杜亞字次公自云京兆人也少頗涉學善言物理及歷代成敗之事至德初於靈武獻封章言政事授校書郎其年杜鴻漸爲河西節度辟爲從事累授評事御史後入朝歷工戶兵吏四員外郎永泰末劍南叛亂鴻漸以宰相出領山劍副元帥以亞及楊炎並爲判官使還授吏部郎中諫議大夫炎爲禮部郎中知制誥中書舍人亞自以才用合當柄任雖爲諫議大夫而心不悅李栖筠承恩衆望必爲宰相亞厚結之元載得罪亞與劉晏李涵等七人同鞠訊之載死之翌日亞遷給事中河北宣慰使宰相常袞亦不悅亞歲餘出爲洪州刺史

兼御史中丞江西都團練觀察使德宗初嗣位勵精求賢令中使召亞亞自揣必以宰輔見徵乃促程而進累路與人言議語及行宰相事方面或以公事諮祈亞皆納之既至帝微知之不悅又奏對辭旨踈闊出爲陝州觀察使兼轉運使尋遷河中晉絳等州防禦觀察使楊炎作相劉晏得罪亞坐貶睦州刺史興元初召拜刑部侍郎出爲揚州長史兼御史大夫淮南節度觀察使時承陳少遊征稅煩重奢侈僭濫之後又新遭王紹亂兵剽掠淮南之人望亞之至革刻舊弊冀以康寧亞自以材當公輔之選而聯出外職志頗不適政事多委叅佐招引賓客談論而已揚州官河填淤漕輓堙塞又僑寄衣冠及工商等多侵衢造宅行旅擁弊亞乃開拓踈啓公私悅賴而盛爲奢侈江南風俗春中有競渡之戲方舟並進以急趨疾進者爲勝亞乃令以漆塗船底貴其速進又爲綺羅之服塗之以油令舟子衣之入水而不濡亞本書生奢縱如此朝廷亟聞之貞元五年以戶部侍郎竇覲爲淮南節度代亞亞猶以舊望竇覲甚畏之改檢校吏部尚書

判東都尚書省事充東都留守都防禦使既病風尚建利以固寵奏請開苑內地爲營田以資軍糧減度支每年所給從之亞不躬親部署但委判官張薦楊昞初奏請取荒地營田其苑內地堪耕食者先爲留司中官及軍人等開墾已盡亞計急乃取軍中雜錢舉息與畿內百姓每至田收之際多令軍人車牛散入村鄉收斂百姓所得菽粟將還軍民家略盡無可輸稅人多艱食由是大致流散乃厚賂中官令奏河南尹無政亞自此亦規求兼領河南尹事不果帝漸知虛誕乃以禮部尚書董晉代爲東都留守召亞還京師既風疾漸深又患脚膝不任朝謁貞元十四年卒于家年七十四贈太子少傅

王緯字文卿太原人也祖景司門員外萊州刺史父之咸長安尉與昆弟之貴之渙皆善屬文之咸以緯貴故累贈刺史緯舉明經又書判入等歷長安尉出佐使府授御史郎官入朝爲金部員外郎劔南租庸使檢校司封郎中彭州刺史檢校庶子兼御史中丞西川節度營田副使初大曆中路嗣恭爲江西觀察使陷害判官李泌將誅之

緯亦爲路嗣恭判官說諭救解獲免貞元三年泌爲相擢授緯給事中未數日又擢爲潤州刺史兼御史中丞浙江西道都團練觀察使十年加御史大夫兼諸道鹽鐵轉運使三歲加檢校工部尚書緯性勤儉歷官清潔而傷於苛碎多用削刻之吏督察巡屬人不聊生貞元十四年卒年七十一廢朝一日贈太子少保

李若初趙郡人貞觀中并州長史工部侍郎弘節之曾孫也祖道謙太府卿若初少孤貧初爲轉運使劉晏下微冗散職晏判官包佶重其勤幹以女妻之歷陳州太庫令刺史李芑初蒞官若初獻計請收斂羨餘錢物交結權貴芑厚遇之累歲芑遷河陽三城使奏若初爲從事軍中之事多以委之累授檢校郎中兼中丞懷州刺史轉虢州刺史坐公事爲觀察使劾奏免歸久之出爲衢州刺史遷福州刺史兼御史中丞福建都團練使尋遷越州刺史浙江東道都團練觀察使十四年秋代王緯爲潤州刺史兼御史大夫浙江都團練觀察諸道鹽鐵轉運使善於吏道性嚴強力東斂下吏人甚畏服方整理鹽

法頗有次敘貞元十五年遇疾卒廢朝一日贈禮部尚書

于頔字休明河南人也父庭謂濟王府舍曹累贈尚書左僕射頔少以吏事聞累授京兆府士曹爲尹史勰所賞重勰出鎮襄漢奏爲御史充判官勰爲亂兵所殺頔挺出收葬遺骸時人義之度支使第五琦署爲河東租庸使累授鳳翔少尹度支郎中兼御史中丞轉運租庸糧料鹽鐵等使頔因奏移轉運汴州院於河陰以汴州累遇兵亂散失錢帛故也元載爲諸道營田使又署爲郎官今於東都汝州開置屯田歷戶部侍郎秘書少監京兆尹太府卿代杜濟爲京兆尹及爲大官好任機數專候權要朝列中無勢利者視之蔑如也曲事元載親昵之而爲政苛細無大體丁所生母憂罷及載得罪後出爲鄭州刺史遷河南尹以無政授代還時徵汾州刺史劉暹暹剛腸嫉惡歷典數州皆爲廉使畏懼宰相盧杞恐暹爲御史大夫虧沮已之所見遽稱薦頔爲御史大夫以其柔佞易制也從幸奉天改左散騎常侍歷左千牛上將軍徙大理卿太子少保工部尚書因入朝仆地爲

金吾仗衛掖起改太子少師致仕貞元十五年卒時年七十四

盧徵范陽人也家於鄭之中牟少涉獵書記永泰中江淮轉運使劉晏辟爲從事委以腹心之任累授殿中侍御史晏得罪貶珍州司戶元琇亦晏之門人興元中爲戶部侍郎判度支薦徵爲京兆司錄度支員外琇得罪坐貶爲信州長史遷信州刺史入爲右司郎中驟遷給事中戶部侍郎竇叅深遇之方倚以自代貞元八年春同州刺史闕叅請以尚書左丞趙憬補之特詔用徵以間叅腹心也數歲轉華州刺史徵畀復入用深結託中貴厚遺之故事同華以近地人貧每正至端午降誕所獻甚薄徵遂竭其財賦每有所進獻輒加常數人不堪命疾病卧理者數年貞元十六年卒時年六十四

楊馮宇虛受弘農人舉進士累佐使府徵爲監察御史不樂檢束遂求免累遷起居舍人左司員外郎禮部兵部郎中太常少卿湖南江西觀察使入爲左散騎常侍刑部侍郎京兆尹憑工文辭少負氣節與母弟凝凌相友愛皆有時名重交游尚然諾與穆質許孟容李廌

王仲舒爲友故時人稱楊穆許李之友仲舒以後進慕而入焉性尚簡傲不能接下以此人多怨之及歷二鎮尤事奢侈元和四年拜京兆尹爲御史中丞李夷簡劾奏憑前爲江西觀察使賦罪及他不法事勅付御史臺覆按刑部尚書李鄴大理卿趙昌同鞫問臺中又捕得憑前江西判官監察御史楊瑗繫於臺復命大理少卿胡珣左司員外郎胡証侍御史韋顓同推鞠之詔曰楊憑頃在先朝委以藩鎮累更選用位列大官近者憲司奏劾暴揚前事計錢累萬曾不報聞蒙蔽之罪於何逃責又營建居室制度過老侈靡之風傷我儉德以其自尹京邑人頗懷之將議刑書是加愍惻宜從遐譴以誠百僚可守賀州臨賀縣尉同正仍馳驛發遣先是憑在江西夷簡自御史出官在巡屬憑頗踈縱不顧接之夷簡常切齒及憑歸朝修第於永寧里功作併興又廣蓄妓妾於永樂里之別宅時人大以爲言夷簡乘衆議舉劾前事且言脩營之僭將欲殺之及下獄置對數日未得其事夷簡持之益急上聞且貶焉追舊從事以驗自貞元已來居方鎮

者爲德宗所姑息故窮極僭奢無所畏忌及憲宗即位以法制臨下夷簡首舉憑罪故時議以爲宜然繩之太過物論又譏其深切矣鄭元舉進士第累遷御史中丞貞元中爲河中節度使杜確行軍司馬確卒遂繼爲節度使入拜尚書左丞元和二年轉戶部侍郎兼御史大夫判度支三年春遷刑部尚書兼京兆尹九月復判度支依前刑部尚書兼御史大夫元性嚴毅有威斷更踐劇任時稱其能元和四年以疾辭職守本官逾月卒

杜兼京兆人貞觀中宰相杜正倫五代孫舉進士累辟諸府從事拜濠州刺史兼性浮險豪侈矜氣屬貞元中德宗厭兵革姑息戎鎮至軍郡刺史亦難於更代兼探上情遂練卒脩武占召勁勇三千人以上聞乃恣凶威錄事參軍韋賞團練判官陸楚皆以守職論事忤兼兼密誣奏二人通謀扇動軍中忽有制使至兼率官吏迎于驛中前呼韋賞陸楚出宣制杖殺之賞進士擢第楚充公象先之孫皆名家有士林之譽一朝以無罪受戮郡中股慄天下冤歎之又誣奏李藩

將殺之語在藩事中故兼所至人側目焉元和初入爲刑部吏部郎中拜給事中除金商防禦使旋授河南少尹知府事尋正拜河南尹皆杜佑在相位所借護也元和四年卒于官

裴玢京兆人五代祖踈勒國王綽武德中來朝授鷹揚大將軍封天山郡公因留闕下遂爲京兆人玢初爲金吾將軍論惟明兼德宗幸奉天以戰功封忠義郡王惟明鎮鄜坊累署玢爲都虞候後節度王栖曜卒中軍將何朝宗謀作亂中夜縱火玢匿身不救火遲明而擒朝宗德宗發三司使按問竟斬朝宗及行軍司馬崔輅以同州刺史劉公濟爲節度使以玢爲坊州長史兼侍御史充行軍司馬明年公濟卒拜玢鄜州刺史兼御史大夫充節度觀察等使三年改授山南西道節度觀察等使玢歷二鎮頗以公清苦節爲政不交權倖不務貢獻蔬食弊衣居處纔避風雨而廩庫饒實三軍百姓安業近代將帥無比焉及綿疾辭位請歸長安元和七年卒年六十五贈尚書左僕射謚曰節

薛伍勝州刺史渙之子尚父汾陽王召置麾下著名於諸將間左僕射李揆使西蕃伍爲將從役時賊泚之難昆夷赴義伍馳騎鄉道至于武功擢授左威衛將軍使絕域者前後數四累遷左金吾衛大將軍檢校工部尚書兼將作監出爲鄜坊觀察使元和八年卒于官贈潞州大都督

史臣曰薛播溫敏有文鮑防董戎無術李嚴太原之政可謂美矣蕭昕抱則哲之知杜亞懷非次之望王緯清潔而傷苛碎若初善理而性剛嚴于頎好任機權趨附勢利盧徵厚斂貨賄結託中人楊憑好奢鄭元有斷杜兼殺戮端士怙亂邀君裴玢發姦謀安民和衆而玢弊衣糲食不交權倖帑庾咸實郡邑以寧若夫君子無求備於人捨短從長彰善癉惡則裴玢之善抑之更揚杜兼之惡欲益而彰耳

唐書列傳卷第九十七

劉

胸

聞人詮校刻沈綱同校

杜黃裳

裳子載勝

高郢

郢子定

杜佑

佑子師直式方從

郢子牧牧子德

杜鴻漸深器重之

杜黃裳字遵素京兆杜陵人也登進士第宏辭科杜鴻漸深器重之爲郭子儀朔方從事子儀入朝令黃裳主留務於朔方邠將李懷光與監軍陰謀代子儀乃爲僞詔書欲誅大將溫儒雅等黃裳立辯其僞以告懷光懷光流汗伏罪諸將有難制者黃裳矯子儀命盡出之數月而亂不作後入爲臺省官爲裴延齡所惡十年不遷貞元末爲太常卿王叔文之竊權黃裳終不造其門嘗語其子壻韋執誼今率百官請皇太子監國執誼遽曰丈人纔得一官可復開口議禁中事耶黃裳勃然曰黃裳受恩三朝豈可以一官見買即拂衣而出尋拜平章事邠州節度使韓全義曾居討伐之任無功黃裳奏罷之劉闢作亂議者以劔南險固不宜生事唯黃裳堅請討除憲宗從之又奏

請不以中官爲監軍祇委高崇文爲使黃裳自經營伐蜀以至成功
指授崇文無不懸合崇文素憚劉旌黃裳使人謂崇文曰若不奮命
當以劉旌代之由是得崇文之死力旌平關宰臣入賀帝目黃裳曰
此卿之功也後與憲宗語及方鎮除授黃裳奏曰德宗自艱難之後
事多姑息貞元中每帥守物故必先命中使偵伺其軍動息其副貳
大將中有物望者必厚賂近臣以求見用帝必隨其稱美而命之以
是因循方鎮罕有特命帥守者陛下宜熟思貞元故事稍以法度整
肅諸侯則天下何憂不治憲宗然其言繇是用兵誅蜀夏之後不容
藩臣蹇傲剋復兩河威令復振蓋黃裳啓其衷也黃裳有經畫之才
達於權變然檢身律物寡廉潔之譽以是居鼎職不久二年正月檢
校司空同平章事兼河中尹河中晉絳等州節度使八月封邠國公
三年九月卒於河中年七十一贈司徒謚曰宣黃裳性雅澹寬恕心
雖從長口不忤物始爲卿士女嫁韋執誼深不爲執誼所稱及執誼
譴逐黃裳終保全之洎死嶺表請歸其喪以辦葬事及是被疾醫人

候進其藥疾甚而不怒然爲宰相除授不分流品或官以賂遷時論
惜之黃裳歿後賄賂事發八年四月御史臺奏前永樂令吳憑爲僧
鑒虛受託與故司空杜黃裳於故州邠寧節度使高崇文處納賂四
萬五千貫並付黃裳男載按問引伏勅曰吳憑曾佐使府忝履宦途
自宜畏法惜身豈得爲人通貨事關非道理合懲愆宜配流昭州其
付杜載錢物宰輔之任寵寄實深致茲貨財不能拒絕已令按問悉
合徵收貴全終始之恩俾弘寬大之典其所取錢物並宜矜免杜載
等並釋放載爲太子僕長慶中遷太僕少卿兼御史中丞充入吐蕃
使載弟勝登進士第大中朝位給事中勝子廷堅亦進士擢第

高郢字公楚其先渤海裔人九歲通春秋能屬文天寶末盜據京邑
父伯祥先爲好時尉抵賊禁將加極刑郢時年十五被髮解衣請代
其父賊黨義之乃俱釋後舉進士擢第應制舉登茂才異行科授華
陰尉嘗以魯不合用天子禮樂乃引公羊傳著魯議見稱於時由是
授咸陽尉郭子儀節制朔方辟爲掌書記子儀嘗怒從事張曇奏殺

之郢極言爭救忤子儀旨奏貶倚氏丞李懷光節制邠寧奏爲從事
累轉副元帥判官檢校禮部郎中懷光背叛將歸河中郢言西迎大
駕豈非忠乎懷光忿而不聽及歸鎮又欲悉衆而西時渾瑊軍孤羣
帥未集郢與李鄲誓死駐之屬懷光長子瑋候郢郢乃諭以逆順曰
人臣所宜效順且自天寶以來阻兵者今復誰在况國家自有天命
非獨人力今若恃衆西向自絕于天十室之邑必有忠信安知三軍
不有奔潰者乎李瑋震懼流淚氣索明年春郢與都知兵馬使呂鳴
岳都虞候張延英同謀間道上表及受密詔事洩二將立死懷光乃
大集將卒白刃盈庭引郢詰之郢挺然抗辭無所慙隱憤氣感發觀
者淚下懷光慙沮而止德宗還京命諫議大夫孔巢父中人啖守盈
赴河中宣慰懷光授以太保而懷光怒激其親兵詬詈殺守盈及巢
父巢父之被刃也委於地郢就而撫之及懷光被誅馬燧辟郢爲掌
書記未幾徵拜主客員外遷刑部郎中改中書舍人凡九歲拜禮部
侍郎時應進士舉者多務朋游馳逐聲名每歲冬州府薦送後唯追

奉議集罕肆其業郢性剛正尤嫉其風既領職拒絕請託雖同列通熟無敢言者志在經藝專考程試凡掌貢部三歲進幽獨抑浮華朋濫之風翕然一變拜太常卿貞元十九年冬進位銀青光祿大夫守中書侍郎同中書門下平章事順宗即位轉刑部尚書爲韋執誼等所憚尋罷知政事以本官判吏部尚書事明年出鎮華州元和元年冬復拜太常卿尋除御史大夫數月轉兵部尚書逾月再表乞骸不許又上言曰臣聞勞生佚老天理自然蠕動翾飛日入皆息自非貢禹之守經據古趙喜之正身匪懈韓暨之志節高潔山濤之道德模表縱過常期詎爲貪冒其有當仁不讓急病忘身豈止君命猶宜身舉臣郢不才久辱高位無任由衷歷懇之至乃授尚書右僕射致仕六年七月卒年七十二贈太子太保謚曰貞郢性恭慎廉潔罕與人交持守官奉法勤恪掌誥累年家無制草或謂之曰前輩皆留制集公焚之何也曰王言不可存私家時人重其慎密與鄭珣瑜並命拜相未幾德宗昇遐時同在相位杜佑以宿舊居上而韋執誼由朋黨

專柄順宗風恙方甚樞機不宜而王叔文以翰林學士兼戶部侍郎
充度支副使是時政事王叔文謀議王伾通導李忠言宣下韋執誼
奉行珣瑜自受命憂形顏色至是以勢不可奪因稱疾不起郢則因
循竟無所發以至於罷物論定此爲優劣焉子定嗣定幼聰警絕倫
年七歲時讀尚書湯誓問郢曰柰何以臣伐君郢曰應天順人不爲
非道又問曰用命賞于祖不用命戮于社是順人乎父不能對仕至
京兆叅軍小字董二人以幼慧多以字稱之尤精王氏易嘗爲易圖
合八出以畫八卦上圓下方合則重轉則演七轉而六十四卦六甲
八節備焉著易外傳二十二卷也

杜佑字君卿京兆萬年人曾祖行敏荆益二州都督府長史南陽郡
公祖慤右司員外郎詳正學士父希堅歷鴻臚卿恒州刺史西河太
守贈右僕射佑以蔭入仕補濟南郡叅軍剡縣丞時潤州刺史韋元
甫嘗受恩於希堅佑謁見元甫未之知以故人子待之他日元甫視
事有疑獄不能決佑時在旁元甫試訊於佑佑口對響應皆得其要

元甫奇之乃奏為司法叅軍元甫為浙西觀察淮南節度皆辟為從事深所委信累官至檢校主客員外郎入為工部郎中充江西青苗使轉撫州刺史改御史中丞充容管經畧使楊炎入相徵入朝歷工部金部二郎中並充水陸轉運使改度支郎中兼和糴等使時方軍興餽運之務悉委於佑遷戶部侍郎判度支為盧杞所惡出為蘇州刺史佑母在杞以蘇州憂闕授之佑不行俄換饒州刺史未幾兼御史大夫充嶺南節度使時德宗在興元朝廷故事執政往往遺脫舊嶺南節度常兼五管經畧使佑獨不兼故五管不屬嶺南自佑始也貞元三年徵為尚書左丞又出為陝州觀察使遷檢校禮部尚書楊州大都督府長史充淮南節度使丁母憂特詔起復累轉刑部尚書檢校右僕射十三年徐州節度使張建封卒其子愔為三軍所立詔佑以淮南節制檢校左僕射同平章事兼徐泗節度使委以討伐佑乃大具舟艦遣將孟準先當之準渡淮而敗佑杖之固境不敢進及詔以徐州授愔而加佑兼濠泗等州觀察使在揚州開設營壘三十

餘所士馬修葺然於賓僚間依阿無制判官南宮傳李亞鄭元均爭權頗紊軍政德宗知之並竄於嶺外十九年入朝拜檢校司空同平章事充太清宮使德宗崩佑攝冢宰尋進位檢校司徒充度支鹽鐵等使依前平章事旋又加弘文館大學士時王叔文爲副使佑雖總統而權歸叔文叔文敗又奏李巽爲副使頗有所立順宗崩佑復攝冢宰尋讓金穀之務引李巽自代先是度支以制用惜費漸權百司之職廣署吏員繁而難理佑始奏營繕歸之將作木炭歸之司農染練歸之少府綱條頗整公議多之朝廷乞其議元和元年冊拜司徒同平章事封岐國公時河西党項潛導吐蕃入寇邊將邀功亟請擊之佑上疏論之曰臣伏見党項與西戎潛通屢有降人指陳事迹而公卿廷議以爲誠當謹兵戎備侵軼益發甲卒邀其寇暴此蓋未達事機匹夫之常論也夫蠻夷猾夏唐虞已然周宣中興獫狁爲害但命南仲往城朔方追之太原及境而止誠不欲弊中國而怒遠夷也秦平六國恃其兵力北築長城以拒匈奴西逐諸羗出於塞外勞力

擾人結怨階亂中國未靜白徒競起海內雲擾實生謫戍漢武因文
景之富命將興師遂至戶口減半竟下哀痛之詔罷田輪臺前史書
之尚嘉其先迷而後復蓋聖王之理天下也唯務綏靜蒸人西至流
沙東漸于海在南與北亦存聲教不以遠物爲珍匪求遐方之貢豈
疲內而事外終得少而失多故前代納忠之臣並有匡君之議淮南
王請息師于閩越賈捐之願棄地于珠崖安危利害高縣前史昔馮
奉世矯漢帝之詔擊莎車傳其王首於京師威震西域宣帝大悅議
加爵土之賞蕭望之獨以爲矯制違命雖有功效不可爲法恐後之
奉使者爭逐發兵爲國家生事述理明白其言遂行國家自天后已
來突厥默啜兵強氣勇屢寇邊城爲害頗甚開元初邊將郝靈佺親
捕斬之傳首闕下自以爲功代莫與二坐望榮寵宋璟爲相慮武臣
邀功爲國生事止授以郎將由是訖開元之盛無人復議開邊中國
遂寧外夷亦靜此皆成敗可徵鑒戒非遠且党項小蕃雜處中國本
懷我德當示撫綏間者邊將非廉亟有侵刻或利其善馬或取其子

女便賄方物徵發役徒勞苦既多叛亡遂起或與北狄通使或與西戎寇邊有爲使然固當懲革傳曰遠人不服則修文德以來之管子曰國家無使弱爲邊境此誠聖哲識微知著之遠略也今戎醜方強邊備未實誠宜慎擇良將誠之完葺使保誠信絕其末取用示懷柔來則懲禦去則謹備自然彼懷革其姦謀何必遽圖興師坐致勞費陛下上聖君人覆育群類動必師古謀無不臧伏望聖保求圖置兵衽席天下幸甚臣識昧經綸學慙博究竊鼎鉉之寵任爲朝廷之老臣恩深莫倫志懇思報臧否備閱芻蕘上陳有瀆旒宸伏深惶悚上深嘉納歲餘請致仕詔不許但令三五日一入中書平章政事每入奏事憲宗優禮之不名常呼司徒佑城南樊川有佳林亭卉木幽邃佑每與公卿讌集其間廣陳妓樂諸子咸居朝列當時貴盛莫之與比元和七年被疾六月復乞骸骨表四上情理切至憲宗不獲已許之詔曰宣力濟時爲臣之懿躅辭榮告老行已之高風況乎任重公台義深翼贊秉沖讓之志堅金石之誠敦諭既勤所執彌固則當遂

其衷懇進以崇名尚齒優賢斯王化之本也金紫光祿大夫守司徒
同中書門下平章事兼充弘文館大學士太清宮使上柱國岐國公
食邑三千戶杜佑嚴廊上才邦國茂器蘊經通之識履溫厚之姿寬
裕本乎性情謀猷彰乎事業博聞強學知歷代公華之宜爲政惠人
審羣黎利病之要由是再司邦用累歷藩方出總戎麾入和鼎實筆
膺重寄歷事先朝左右朕躬夙夜不懈命以詔冊登之上公肅恭在
廷華髮承弁茲可謂國之元老人之具瞻者也朕續承丕業思弘景
化選勞求舊期致時邕方伸引翼之儀遽抗懸車之請而又固辭年
疾乞就休閑已而復來星琯屢變有不可抑良用耿然永惟古先哲
王君臣之際臣有耆艾以求其退君有優賜以徇其情乃輟鄧禹敷
教之功仍增王祥輔導之秩俾養浩然之氣安於敬止之鄉庶平怡
神葆和永綏福履仍加階級以厚寵章可光祿大夫守太保致仕宜
朝朔望是日上遣中使就佑第賜絹伍百匹錢伍佰阡其年十一月
薨壽七十八廢朝三日冊贈太傅謚曰安簡佑性敦厚強力尤精吏

職雖外示寬和而持身有術爲政弘易不尚嚴察掌計治民物便而
濟馭戎應變卽非所長性嗜學該涉古今以富國安人之術爲已任
初開元末劉秩採經史百家之言取周禮六官所職撰分門書三十
五卷號曰政典大爲時賢稱賞房琯以爲才過劉更生佑得其書尋
味厥旨以爲條目未盡因而廣之加以開元禮樂書成二百卷號曰
通典貞元十七年自淮南使人詣闕獻之曰臣聞太上立德不可廢
幾其次立功遂行當代其次立言見志後學由是往哲述祖述將
施有政用乂邦家臣本以門資幼登官序仕非遊藝才不逮人徒懷
自強頗玩墳籍雖履歷叨幸或職劇務殷竊惜光陰未嘗輕廢夫孝
經尚書毛詩周易三傳皆父子君臣之要道十倫五教之宏綱如日
月之下臨天地之大德百王是式終古攸遵然多記言罕存法制愚
管窺測莫達高深輒肆荒虛誠爲億度每念惜學莫探政經略觀歷
代衆賢著論多陳紊失之弊或闕匡拯之方臣旣庸淺寧詳損益未
原其始莫暢其終尚賴周氏典禮秦皇蕩滅不盡縱有繁雜且用隼

繩至於往昔是非可爲來今龜鏡布在方冊亦粗研尋自頃續脩年
踰三紀識寡思拙心昧辭蕪圖籍寔多事目非少將事功畢罔愧乖
踈固不足發揮大猷但竭愚盡慮而已書凡九門計貳佰卷不敢不
具上獻庶明鄙志所之塵瀆聖聰兢惶無措優詔嘉之命藏書府其
書大傳於時禮樂刑政之源千載如指諸掌大爲士君子所稱佑性
勤而無倦雖位極將相手不釋卷質明視事接對賓客夜則燈下讀
書孜孜不怠與賓佐談論人憚其辯而伏其博設有疑悞亦能質正
始終言行無所玷缺唯在淮南時妻梁氏亡後昇嬖妾李氏爲正室
封密國夫人親族子弟言之不從時論非之三子師損嗣位終司農
少卿

式方字考元以蔭授揚府叅軍轉常州晉陵尉浙西觀察使王緯辟
爲從事入爲太子通事舍人改太常寺主簿明練鍾律有所考定深
爲高郢所賞時父作鎮揚州家財鉅萬甲第在安仁里杜城有別墅
亭館林池爲城南之最昆仲皆在朝廷與時賢遊從樂而有節旣而

佑入中書出爲昭應令丁父憂服闋遷司農少卿賜金紫加正議大夫太僕卿時少子悰選尚公主式方以右戚移病不視事久之文宗即位轉兼御史中丞充桂管觀察都防禦使長慶二年三月卒於位贈禮部尚書式方性孝友弟兄尤睦季弟從郁少多疾病式方每躬自煎調藥膳水飲非經式方之手不入於口及從郁夭喪終年號泣殆不勝情士友多之子惲惲悰恂惲嗣富平尉惲興平尉

悰以蔭三遷太子司議郎元和九年選尚公主召見于麟德殿尋尚岐陽公主加銀青光祿大夫殿中少監駙馬都尉岐陽憲宗長女郭妃之所生自頃選尚多於貴戚或武臣節將之家于時翰林學士獨孤郁權德輿之女壻時德輿作相郁避嫌辭內職上頗重學士不獲已許之且歎德輿有佳壻遂令宰臣於卿士家選尚文雅之士可居清列者初於文學後進中選擇皆辭疾不應唯悰願焉累遷至司農卿太和六年轉京兆尹七年檢校刑部尚書出爲鳳翔尹鳳翔隴右節度丁內艱八年起復授忠武軍節度使陳許蔡觀察等使就加兵

部尚書開成初入爲工部尚書判度支屬岐陽公主薨久而未謝文
宗怪之問左右戶部侍郎李珣對曰近日駙馬爲公主服斬衰三年
所以士族之家不願爲國戚者半爲此也杜棕未謝拘此服紀也上
愕然曰予初不知乃詔曰制服輕重必由典禮如聞往者駙馬爲公
主服三年緣情之義殊非故實違經之制今乃聞知宜令行杖周永
爲通制三年改戶部尚書兼判戶部度支事會昌中拜中書侍郎同
中書門下平章事尋加左僕射大初中出鎮西川降先沒吐蕃維州
州即古西戎地也其地南界江陽岷山連嶺而西不知其極北望隴
山積雪如玉東望成都若在井底地接石紐山夏禹生于石紐山是
也其州在岷山之孤峯三面臨江天寶後河隴繼陷惟此州在焉吐
蕃利其險要二十年間設計得之遂據其城因號曰無憂城吐蕃由
是不虞邛蜀之兵先是李德裕鎮西川維州吐蕃首領悉怛謀以城
來降德裕奏之執政者與德裕不協遽勒還其城至是復收之亦不
因兵刃乃人情所歸也俄復入相加司空繼加司徒歷鎮重藩至是

加太傅邠國公恂無他才常延接寒素甘食竊位而已

從郁以蔭貞元末再遷太子司議郎元和初轉左補闕諫官崔群韋貫之獨孤郁等以從郁宰相子不合爲諫官乃降授左拾遺群等復執曰拾遺之與補闕雖資品有殊皆名諫列父爲宰相子爲諫官若政有得失不可使子論父乃改爲秘書丞終駕部員外郎子牧顓俱登進士第顓後病目而卒

牧字牧之旣以進士擢第又制舉登乙第解褐弘文館校書郎試左武衛兵曹參軍沈傳師廉察江西宣州辟牧爲從事試大理評事又爲淮南節度推官監察御史裏行轉掌書記俄真拜監察御史分司東都以弟顓病目棄官授宣州團練判官殿中侍御史內供奉遷左補闕史館修撰轉膳部比部員外郎並兼史職出牧黃池睦三郡復遷司勳員外郎史館修撰轉吏部員外郎又以弟病免歸授湖州刺史入拜考功郎中知制誥歲中遷中書舍人牧好讀書工詩爲文嘗自負經緯才略武宗朝誅昆夷鮮卑牧上宰相書論兵事言胡戎入

寇在秋冬之間盛夏無備宜五六月中擊胡爲便李德裕稱之注曹
公所定孫武十三篇行於代牧從兄悰隆盛于時牧居下位心嘗不
樂將及知命得病自爲墓志祭文又嘗夢人告曰爾改名畢踰月奴
自家來告曰炊將熟而甑裂牧曰皆不祥也俄又夢書行紙曰皎皎
白駒在彼空谷寤寢而歎曰此過隙也吾生於角徵還於角爲第八
宮吾之甚厄也予自湖守遷舍人木還角足矣其年以疾終於安仁
里年五十有集二十卷曰杜氏樊川集行於代子德祥官至丞郎

史臣曰黃裳以道致君持誠奉主辨懷光之詐罷全義之征討賊闢
之兇舉無遺筭葬執誼之愜豈曰不仁郢天縱之性惚恍之年代父
命於臨刑孝也懷光之亂王人被傷撫巢父於賊庭義也抑浮濫之
流考藝文之士盡搜幽滯大變時風正也保止足之名辭榮辱之路
高避世利遐躅昔賢智也忠孝全矣仁智備矣此二子者皆臨大節
而不可奪也佑承蔭入仕讞獄受知博古該今輸忠效用力居極品
榮逮子孫操修之報不亦宜哉及其賔寮素法嬖妾受封事重因循

難乎語於正矣。牧之文章，惊之長厚，能否既異，才位不倫，命矣夫。
贊曰：貞公壯節臨難奮發，言行無玷，斯爲明哲。戡亂阜俗，時泰位隆，
國之名臣，鄭公岐公。

唐書列傳卷九十七

唐書列傳卷第九十八

劉 响 等修

聞人詮校刻沈桐同校

裴埴

李吉甫

李藩

權德輿子璩

裴埴字弘中河東聞喜人垂拱中宰相居道七代孫埴弱冠舉進士貞元中制舉賢良極諫對策第一授美原縣尉秩滿藩府交辟皆不就拜監察御史轉殿中侍御史尚書禮部考功二員外郎時吏部侍郎鄭珣瑜請埴考詞判埴守正不受請託考覈皆務才實元和初召入翰林爲學士轉考功郎中知制誥尋遷中書舍人李吉甫自翰林承旨拜平章事詔將下之夕感出涕謂埴曰吉甫自尚書郎流落遠地十餘年方歸便入禁署今纔滿歲後進人物罕所接識宰相之職宜選擇賢俊今則懵然莫知能否卿多精鑒今之才傑爲我言之埴取筆疏其名氏得三十餘人數月之內選用略盡當時翕然稱吉甫有得人之稱三年詔舉賢良時有皇甫湜對策其言激切牛僧孺李

宗閔亦苦詆時政考官楊於陵革貫之升三子之策皆上第埴居中覆視無所同異及爲貴倖泣訴請罪於上憲宗不得已出於陵貫之官罷埴翰林學士除戶部侍郎然憲宗知埴好直信任彌厚其年秋李吉甫出鎮淮南遂以埴代爲中書侍郎同平章事明年加集賢院大學士監修國史埴奏集賢御書院請準六典登朝官五品已上爲學士六品已下爲直學士自非登朝官不問品秩並爲校理其餘名目一切勒停史館請登朝官入館者並爲修撰非登朝官並爲直史館仍求爲常式皆從之元和五年中風病憲宗甚嗟惜中使旁午致問至於藥膳進退皆令疏陳疾益痼罷爲兵部尚書仍進階銀青明年改太子賓客卒廢朝賻禮有加贈太子少傅初埴在翰林承旨屬憲宗初平吳蜀勵精思理機密之務一以關埴埴小心敬慎其稱中旨及作相之後懇請旌別淑慝杜絕蹊徑齊整法度考課吏理皆蒙垂意聽納吐突承璀自春官侍憲宗恩顧莫二承璀承間欲有所關說憲宗憚埴誠勿復言在禁中常以官呼埴而不名楊於陵爲嶺南

節度使與監軍許遂振不和遂振誣奏於陵憲宗令追與慢官垧曰以遂振故罪一藩臣不可請授吏部侍郎嚴綬在太原其政事一出監軍李輔光綬但拱手而已垧具奏其事請以李鄴代之王士真死其子承宗以河北故事請代父爲帥憲宗意速於太平且頻盪寇孽謂其地可取吐突承璀恃恩謀撓垧權遂伺君意請自征討盧從史陰苞逆節內與承宗相結約而外請興師以圖厚利垧二陳其不可且言武俊有大功於朝前授李師道而後奪承宗是賞罰不一無以沮勸天下逗留半歲憲宗不決承璀之策竟行及師臨賊境從史果攜貳承璀數督戰從史益驕倨反覆官軍病之時王師久暴露無功上意亦怠後從史遣其衙門將王翊元入奏垧延與語微動其心且喻以爲臣之節翊元因吐誠言從史惡稔可圖之狀垧遣再往比復還遂得其大將烏重胤等要領垧因從容啓言從史暴戾有無君之心今聞其視承璀如嬰孩往來神策壁壘間益自恃不嚴是天亡之時也若不因其機而致之後雖興師未可以歲月破也憲宗初愕然

熟思其計方許之。垧因請密其謀。憲宗曰：「此唯李絳、梁守謙知之時。」絳承旨翰林守謙掌密命。後承璀竟擒從史平上黨。其年秋班師。垧以承璀首唱用兵。今還無功。陛下縱念舊勞不能加顯戮。亦請貶黜以謝天下。遂罷承璀兵柄。先是天下百姓輸賦於州府。一曰上供。二曰送使。三曰留州。建中初。定兩稅。時貨重錢輕。是後貨輕錢重。齊人所出固已倍其初。征以其留州送使所在。長史又降省估。使就實估。以自封殖。而重賦於人。及垧爲相。奏請天下留州送使物一切令依省估。其所在觀察使仍以其所蒞之郡租賦自給。若不足。然許徵於支郡。其諸州送使額悉變爲上供。故江淮稍息肩。垧雖年少。驟居相位。而器局峻整。有法度。雖大寮前輩其造。請不敢干以私。諫官言時政得失舊事操權者多不悅。其舉職垧在中書。有獨孤與李二補闕。孜孜獻納。今之遷轉可謂酬勞無愧矣。嚴補闕官業或異於斯。昨者進擬不無疑。緩休復悚。而退垧在翰林。舉李絳、崔羣同掌密命。及在

相位用韋貫之裴度知制誥擢李夷簡爲御史中丞其後繼踵入相
咸著名跡其餘量材賦職皆叶人望選任之精前後莫及議者謂增
作相才與時會知無不爲于時朝無倖人百度寔理而再周邁疾以
至休謝公論惜之

李吉甫字弘憲趙郡人父栖筠代宗朝爲御史大夫名重於時國史
有傳吉甫少好學能屬文年二十七爲太常博士該洽多聞尤精國
朝故實公華折衷時多稱之遷屯田員外郎博士如故改駕部員外
宰臣李泌竇叅推重其才接遇頗厚及陸贄爲相出爲明州員外長
史久之遇赦起爲忠州刺史時贄已謫在忠州議者謂吉甫必逞憾
於贄重構其罪及吉甫到部與贄甚歡未嘗以宿嫌介意六年不徙
官以疾罷免尋授柳州刺史遷饒州先是州城以頻喪四牧廢而不
居物怪變異郡人信驗吉甫至發城門管鑰剪荆榛而居之後人乃
安憲宗嗣位徵拜考功郎中知制誥既至闕下旋召入翰林爲學士
轉中書舍人賜紫憲宗初即位中書小吏滑渙與知樞密中使劉光

琦暱善頗竊朝權吉甫請去之劉闢反帝命誅討之計未決吉甫密
贊其謀兼請廣徵江淮之師由三峽路入以分蜀寇之力事皆允從
由是甚見親信二年春杜黃裳出鎮擢吉甫爲中書侍郎平章事吉
甫性聰敏詳練物務自員外郎出官留滯江淮十五餘年備詳閭里
疾苦及是爲相患方鎮貪恣乃上言使屬郡刺史得自爲政敘進群
材甚有美稱三年秋裴垪爲僕射判度支交結權倖欲求宰相先是
制策試直言極諫科其中有譏刺時政忤犯權倖者因此垪黨揚言
皆執政教指異以搖動吉甫賴諫官李約獨孤郁李正辭蕭俛密疏
陳奏帝意乃解吉甫早歲知獎羊士諤擢爲監察御史又司封員外
郎呂溫有詞藝吉甫亦眷接之竇群亦與羊呂善羣初拜御史中丞
奏請士諤爲侍御史溫爲郎中知雜事吉甫怒其不先關白而所請
又有超資者持之數日不行因而有隙羣遂伺得日者陳克明出入
吉甫家密捕以聞憲宗詰之無姦狀吉甫以裴垪久在翰林憲宗親
信必當大用遂密薦垪代已因自圖出鎮其年九月拜檢校兵部尚

書兼中書侍郎平章事充淮南節度使上御通化門樓餞之在揚州
每有朝廷得失軍國利害皆密疏論列又於高郵縣築堤爲塘旣田
數千頃人受其惠五年冬裴垪病免明年正月授吉甫金紫光祿大
夫中書侍郎平章事集賢殿大學士監修國史上柱國趙國公及再
入相請減省職貢并諸色出身胥吏等及量定中外官俸料時以爲
當京城諸僧有以莊磴免稅者吉甫奏曰錢米所徵素有定額寬緇
徒有餘之力配貧下無告之民必不可許憲宗乃止又請歸普潤軍
於涇原七年京兆尹元義方奏永昌公主准禮令起祠堂請其制度
初貞元中義陽義章二公主咸於墓所造祠堂一百二十間費錢數
萬及永昌之制上令義方減舊制之半吉甫奏曰伏以求昌公主稚
年夭枉舉代同悲況於聖情固所鍾念然陛下猶減制造之半示折
衷之規昭儉訓人實越今古臣以祠堂之設禮典無文德宗皇帝恩
出一時事因習俗當時人間不無竊議昔漢章帝時欲爲光武原陵
明帝顯節陵各起邑屋東平王蒼上疏言其不可東平王即光武之

愛子明帝之愛弟賢王之心豈惜費於父兄哉誠以非禮之事人君所當慎也今者依義陽公主起祠堂臣恐不如量置墓戶以充守奉翌日上謂吉甫曰卿昨所奏罷祠堂事深愜朕心朕初疑其冗費緣未知故實是以量減覽卿所陳方知無據然朕不欲破二十戶百姓當揀官戶委之吉甫拜賀上曰卿此豈是難事有關朕身不便於時者苟聞之則改此豈足多耶卿但勤匡正無謂朕不能行也七年七月上御延英顧謂吉甫曰朕近日畋遊悉廢唯喜讀書昨於代宗實錄中見其時綱紀未振朝廷多事亦有所鑒誠向後見卿先人事迹深可嘉歎吉甫降階跪奏曰臣先父伏事代宗盡心盡節迫於流運不待聖時臣之血誠常所追恨陛下耽悅文史聽覽日新見臣先父忠於前朝著在實錄今日特賜褒揚先父雖在九泉如覩白日因俯伏流涕上慰諭之八年十月上御延英殿問時政記何事時吉甫監修國史先對曰是宰相記天子事以授史官之實錄也古者右史記言今起居舍人是左史記事今起居郎是永徽中宰相姚璩監修

國史慮造膝之言或不下聞因請隨奏對而記於伏下以授于史官
今時政記是也上曰間或不修何也曰臣奉德音未及施行揔謂機
密故不可書以送史官其間有謀議出於臣下者又不可自書以付
史官及已行者制令昭然天下皆得聞知即史官之記不待書以授
也且臣觀時政記者姚璿修之於長壽及璿罷而事寢賈耽齊抗修
之於貞元及耽抗罷而事廢然則開時政化者不虛美不隱惡謂之
良史也是月迴紇部落南過磧取西城柳谷路討吐蕃西城防禦使
周懷義表至朝廷大恐以爲迴紇聲言討吐蕃意是入寇吉甫奏曰
迴紇入寇且當漸絕和事不應便來犯邊但須設備不足爲慮因請
自夏州至天德復置廢館一十一所以通緩急又請發夏州騎士五
百人營於經略故城應援驛使兼護党項九年請於經略故城置宥
州六胡州以在靈鹽界開元中廢六州曰國家舊置宥州以寬宥爲
名領諸降戶天寶末宥州寄理於經畧軍蓋以地居其中可以揔統
蕃部北以應接天德南援夏州今經略遙隸靈武又不置軍鎮非舊

制也憲宗從其奏復置宥州詔曰天寶中有州寄理於經畧軍實應已來因循遂廢由是昆夷屢擾党項靡依蕃部之人撫懷莫及朕方弘遠略思復舊規宜於經畧軍置宥州仍爲上州於郭下置延恩縣爲上縣屬夏綏銀觀察使淮西節度使吳少陽卒其子元濟請襲父位吉甫以爲淮西內地不同河朔且四境無黨援國家常宿數十萬兵以爲守禦宜因時而取之頗叶上旨始爲經度淮西之謀元和九年冬暴病卒年五十七憲宗傷悼久之遣中使臨弔常贈之外內出絹五百匹以恤其家再贈司空吉甫初爲相頗洽時情及淮南再徵中外延望風采秉政之後視聽時有所蔽人心疑憚之時負公望者慮爲吉甫所忌多避畏憲宗潛知其事未周歲遂擢用李絳大與絳不協而絳性剛訐於上前互有爭論人多直絳然性畏慎雖其不悅者亦無所傷服物食味必極珍美而不殖財產京師一宅之外無他第翌公論以此重之有司謚曰敬憲及會議度支郎中張仲方駁之以爲太優憲宗怒貶仲方賜吉甫謚曰忠懿甫嘗討論易象異義附

於一行集注之下及綴錄東漢魏晉周隋故事訖其成敗損益大端目爲六代略凡三十卷分天下諸鎮紀其山川險易故事各寫其圖於篇首爲五十四卷號爲元和郡國圖又與史官等錄當時戶賦兵籍號爲國計簿凡十卷纂六典諸職爲百司舉要一卷皆奏上之行於代子德脩德裕

李藩字叔翰趙郡人曾祖至遠天后時李昭德薦爲天官侍郎不諂昭德謝恩時昭德怒奏黜爲壁州刺史祖畬開元時爲考功郎中事母孝謹母卒不勝喪死至遠畬皆以志行名重一時父承爲湖南觀察使亦有名藩少恬淡修檢雅容儀好學父卒家富於財親族弔者有挈去不禁愈務散施不數年而貧年四十餘未仕讀書揚州困於自給妻子怨尤之晏如也杜亞居守東都以故人子署爲從事洛中盜發有誣牙料令孤運者亞信之拷掠竟罪藩知其冤爭之不從遂辭出後獲真盜宋瞿曇藩益知名張建封在徐州辟爲從事居幕中謙謙未嘗論細微杜兼爲濠州刺史帶使職建封病革兼疾驅到府

難贊藩與同列省建封出而泣語兼曰僕射公奄忽如此公宜在州
防遏今棄州此來欲何也宜疾去不若此當奏聞兼錯愕不虞遂徑
歸建封死兼悔所志不就怨藩甚既歸揚州兼因誣奏藩建封死時
搖動軍中德宗大怒密詔杜佑殺之佑素重藩懷詔旬日不忍發因
引藩論釋氏曰因報之事信有之否藩曰信然曰審如此君宜遇事
無恐因出詔藩覽之無動色曰某與兼信爲報也佑曰慎勿出口吾
已密論持百口保君矣德宗得佑解怒不釋亟追藩赴闕及召見望
其儀形曰此豈作惡事人耶乃釋然除秘書郎王紹持權邀藩一相
見即用終不就王仲舒韋成季呂洞輩爲郎官朋黨輝赫日會聚歌
酒慕藩名強致同會藩不得已一至仲舒輩好爲訛語俳戲後召藩
堅不去曰吾與仲舒輩終日不曉所與言何也後果敗遷主客員外
郎尋換右司時順宗冊廣陵王淳爲皇太子兵部尚書王純請改名
紹時議非之皆云皇太子亦人臣也東宮之臣改之宜也非其屬而
改之諂也如純輩豈爲以禮事上耶藩謂人曰歷代故事皆自不識

大體之臣而失之因不可復正無足怪也及太子卽位憲宗是也宰相改郡縣名以避上名唯監察御史韋淳不改旣而有詔以陸淳爲給事中改名質淳不得已改名處厚議者嘉之藩尋改吏部員外郎元和初遷吏部郎中掌曹事爲吏所蔽濫用官闕黜爲著作郎轉國子司業遷給事中制勅有不可遂於黃勅後批之吏曰宜別連白紙藩曰別以白紙是文狀豈曰批勅耶裴垕言於帝以爲有宰相器屬鄭絪罷免遂拜藩門下侍郎同平章事藩性忠藎事無不言上重之以爲無隱四年冬顧謂宰臣曰前代帝王理天下或家給人足或國貧下困其故何也藩對曰古人云儉以足用蓋足用繫於儉約誠使人君不貴珠玉唯務耕桑則人無滛巧俗自敦本百姓旣足君孰與不足自然帑藏充羨稼穡豐登若人君竭民力貴異物上行下効風俗日奢去本務末衣食益乏則百姓不足君孰與足自然國貧家困盜賊乘隙而作矣今陛下永鑒前古思躋富庶躬尚勤儉自當理平伏願以知之爲非艱保之爲急務宮室輿馬衣服器玩必務損之又

損示人變風則天下幸甚帝曰儉約之事是我誠心貧富之由如卿所說唯當上下相勗以保此道似有踰濫極言箴規此固深期於卿等也藩等拜賀而退帝又問曰禳災祈福之說其事信否藩對曰臣竊觀自古聖達皆不禱祠故楚昭王有疾卜者謂河爲祟昭王以河不在楚非所獲罪孔子以爲知天道仲尼病子路請禱仲尼以爲神道助順繫於所行已旣全德無愧屋漏故答子路云丘之禱久矣書云惠迪吉從逆凶言順道則吉從逆則凶詩云自求多福則禍福之來咸應行事若苟爲非道則何福可求是以漢文帝每有祭祀使有司敬而不祈其見超然可謂盛德若使神明無知則安能降福必其有知則私已求媚之事君子尚不可悅也況於明神乎由此言之則履信思順自天祐之苟異於此實難致福故堯舜之德唯在修己以安百姓管仲云義於人者和於神蓋以人爲神主故但務安人而已號公求神以致危亡王莽妄祈以速漢兵古今明誠書傳所紀伏望陛下每以漢文孔子之意爲準則百福具臻帝深嘉之時河東節度

使王鐸用錢數千萬賂遺權倖求兼宰相藩與權德輿在中書有密
旨曰王鐸可兼宰相宜即擬來藩遂以筆塗兼相字却奏上云不可
德輿失色曰縱不可宜別作奏豈可以筆塗詔耶曰勢迫矣出今日
便不可止日又暮何暇別作奏事果寢李吉甫自楊州再入相數日
罷藩爲詹事後數月上思藩召對復有所論列元和六年出爲華州
刺史兼御史大夫未行卒年五十八贈戶部尚書藩爲相材能不及
裴垽孤峻頗後韋貫之然人物清規亦其流也

權德輿字載之天水略陽人父臯字士繇後秦尚書翼之後少以進
士補貝州臨清尉安祿山以幽州長史充河北按察使假其才名表
爲薊縣尉署從事臯陰察祿山有異志畏其猜虐不可以潔退欲潛
去又慮禍及老母天寶十四年祿山使臯獻戎俘自京師迴過福昌
福昌尉仲暮臯從父妹壻也密以計約之比至河陽詐以疾亟召暮
暮至臯示已啗瞪暮而瞑暮乃勉哀而哭手自含襲旣逸臯而葬其
棺人無知者從吏以詔書還臯母初不知聞臯之死慟哭傷行路祿

山不疑其詐死許其母歸臯時微服匿跡候母於淇門旣得侍其母乃奉毋晝夜南去及渡江祿山已反矣由是名聞天下淮南採訪使高適表臯試大理評事充判官屬永王璘亂多劫士大夫以自從臯懼見迫又變名易服以免玄宗在蜀聞而嘉之除監察御史會丁母喪因家洪州時南北隔絕或踰歲不聞詔命有中使奉宣至洪州經時未復過有求取州縣苦之時有王遘爲南昌令將執按之因見臯白其事臯不言久之垂涕曰方今何由可致一勅使而遽有此言因掩涕而起遘遽拜謝之浙西節度使顏真卿表臯爲行軍司馬詔徵爲起居舍人又以疾辭嘗曰本自全吾志豈受此之名耶李季卿爲江淮黜陟使奏臯節行改著作郎復不起兩京蹂於胡騎士君子多以家渡江東知名之士如李華柳識兄弟者皆仰臯之德而友善之大曆三年卒于家年四十六元和中謚曰貞孝初臯卒韓洄王定爲服朋友之喪李華爲其墓表以爲分天下善惡一人而已前贈秘書監至是因子德輿爲相立家廟至元和十二年復贈太子太保德輿

生四歲能屬詩七歲居父喪以孝聞十五爲文數百篇編爲重蒙集
十卷名聲日大韓洄黜陟河南辟爲從事試秘書省校書郎貞元初
復爲江西觀察使李兼判官再遷監察御史府罷杜佑裴胄皆奏請
二表同日至京德宗雅聞其名徵爲太常博士轉左補闕八年關東
大水上䟽請降詔恤隱遂命奚陟等四人使裴延齡以巧倖判度支
九年自司農少卿除戶部侍郎仍判度支德輿上䟽曰臣伏以爵人
於朝與衆共之況經費之司安危所繫延齡頃自權判逮今閒歲不
稱之聲日甚於初羣情衆口誼於朝市不敢悉煩聖聽今謹略舉所
聞多云以常賦正額支用未盡者便爲剽利以爲己功又重破官錢
買常平先所收市雜物遂以再給估價用充別貯利錢又云邊上諸
軍皆至懸關自今春已來並不支糧伏以疆場之事所虞非細誠聖
謩前定終事切有司陛下必以延齡孤貞獨立爲時所抑醜正有黨
結此流言何不以新收剽利徵其本末爲分析條奏又擇朝賢信臣
與中使一人巡覆邊軍察其資儲有無虛實倘延齡受任已來精心

勤力每事省約別收羨餘於正數各有區分邊軍儲蓄實猶可支身
自斂怨爲國惜費自宜更示優獎以洗群疑明書厥勞昭示天下如
或言者非謬罔上實多豈以邦國重務委之非據臣職在諫曹合採
群議正拜已來今已旬日道路云云無不言此豈京師士庶之衆愚
智之多合而爲黨共有讎嫉陛下亦宜稍迴聖鑑俯察羣心況臣之
事君如子事父今當聖明不諱之代若猶愛身隱情是不忠不孝莫
大之罪敢瀝肝血伏待刑書十年遷起居舍人歲中兼知制誥轉駕
部員外郎司勳郎中職如舊遷中書舍人是時德宗親覽庶政重難
除授凡命於朝多稱自御札始德輿知制誥給事有徐岱舍人有高
郢居數歲岱卒郢知禮部貢舉獨德輿直禁垣數旬始歸嘗上疏請
除兩省官德宗曰非不知卿之勞苦禁掖清切須得如卿者所以久
難其人德輿居西掖八年其間獨掌者數歲貞元十七年冬以本官
知禮部貢舉來年真拜侍郎凡三歲掌貢士至今號爲得人轉戶部
侍郎元和初歷兵部吏部侍郎坐郎吏誤用官闕改太子賓客復爲

兵部侍郎遷太常卿五年冬宰相裴垪寢疾德輿拜禮部尚書平章事與李藩同作相河中節度王鐸來朝貴倖多譽鐸者上將加平章事李藩堅執以爲不可德輿繼奏曰夫平章事非序進而得國朝方鎮帶宰相者蓋有大忠大勲大曆已來又有跋扈難制者不得已而與之今王鐸無大忠勲又非姑息之時欲假此名實恐不可上從之運糧使董溪于臯謨盜用官錢詔流嶺南行至湖外密令中使皆殺之他日德輿上疏曰竊以董溪等當陛下憂山東用兵時領糧料供軍重務聖心委付不比尋常敢負恩私恣其賊犯使之萬死不足塞責弘寬大之典流竄太輕陛下合改正罪名兼責臣等疎畧但詔令已下四方聞知不書明刑有此處分竊觀衆情有所未喻伏自陛下臨御已來每事以誠實與天地合德與四時同符萬方之人沐浴皇澤至如于董所犯合正典章明下詔書與衆同棄卽人各懼法人各謹身臣誠知其罪不容誅又是已過之事不合論辯上煩聖聰伏以陛下聖德聖姿度越前古頃所下一詔舉一事皆合理本皆順人心

伏慮他時更有此比但要有司窮鞫審定罪名或致之極法或使自盡罰一勸百孰不甘心巍巍聖朝事體非細臣每於延英奏對退思陛下求理之言生逢盛明感涕自賀況以愚滯朴訥聖鑒所知伏惟恕臣迂踈察臣丹懇及李吉甫自淮南詔徵未一年上又繼用李絳時上求理方切軍國無大小一付中書吉甫絳議政頗有異同或於上前論事形於言色其有諂於理者德輿亦不能爲發明時人以此譏之竟以循默而罷復守本官尋以檢校吏部尚書爲東都留守後拜太常卿改刑部尚書先是許孟容蔣乂等奉詔刪定格勅孟容等尋改他官乂獨成三十卷表獻之留中不出德輿請下刑部與侍郎劉伯芻等考定復爲三十卷奏上十一年復以檢校吏部尚書出鎮興元十三年八月有疾詔許歸闕道卒年六十贈左僕射謚曰文德輿自貞元至元和三十年間羽儀朝行性直亮寬恕動作語言一無外飾醞藉風流爲時稱嚮於述作特盛六經百氏游詠漸漬其文雅正而弘博王侯將相洎當時名人薨歿以銘紀爲請者什八九時人

嗣宗匠焉尤嗜讀書無寸景斲倦有文集五十卷行於代子璩中書舍人

史臣曰裴垪精鑒熟識舉賢任能啓沃帝心弼諧王道如崔羣裴度韋貫之輩咸登將相皆垪之薦達立言立事知無不爲吉甫該洽典經詳練故實伏裴垪之抽擢致朝倫之式序吉甫知垪之能別髦彥垪知吉甫之善任賢良相須而成不忌不克叔翰修身慎行力學承家批制勅有夕郎之風塗御書見宰執之器而乃輕財散施天爵是期偉哉自待之意也德輿孝悌力學髣髴有聞疏延齡恣行巧行論臯謨不書明刑三十年羽儀朝行實臯之餘慶所鍾此四子者所謂經緯之臣又何慙於王佐矣

贊曰二李秉鈞信爲名臣甫柔而黨藩俊而純裴公鑒裁朝無屈人權之藻思文質彬彬

唐書列傳卷第九十八

唐書列傳卷第九十九

劉

眀

等修

聞人詮校刻沈桐溪校

于休烈

子肅肅子

令狐峒

歸崇敬子登登

奚陟

張薦

薦祖文成薦子

蔣乂

子係

柳登

父芳登弟

沈傳師

父既濟

于休烈河南人也高祖志寧貞觀中任左僕射為十八學士父默成

沛縣今早卒休烈至性貞慤機鑒敏悟自幼好學善屬文與會稽賀

朝萬齊融延陵包融為文詞之友齊名一時舉進士又應制策登科

授秘書省正字累遷右補闕起居郎集賢殿學士轉比部員外郎郎

中楊國忠輔政排不附已者出為中部郡太守值祿山構難肅宗踐

祚休烈自中部赴行在擢拜給事中遷太常少卿知禮儀事兼修國

史肅宗自鳳翔還京勵精聽受嘗謂休烈曰君舉必書良史也朕有

過失卿書之否對曰禹湯罪已其興也勃焉有德之君不忘規過臣

不勝大慶時中原蕩覆典章殆盡無史籍檢尋休烈奏曰國史一百六卷開元實錄四十七卷起居注并餘書三千六百八十二卷並在興慶宮史館京城陷賊後皆被焚燒且國史實錄聖朝大典修撰多時今並無本伏望下御史臺推勘史館所由令府縣招訪有人別收得國史實錄如送官司重加購賞若是史官收得仍赦其罪得一部超授官資得一卷賞絹十匹數月之內唯得一兩卷前修史官工部侍郎韋述陷賊入東京至是以其家藏國史一百一十三卷送于官肅宗以太常鍾磬自隋已來所傳五音或有不調乾元初謂休烈曰古者聖人作樂以應天地之和以合陰陽之序則人不夭扎物不疵癘且金石絲竹樂之器也比親享郊廟每聽懸樂宮商不備或鍾磬失度可盡將鍾磬來朕當於內自定太常集樂工考試數日審知差錯然後令別鑄造磨刻及事畢上臨殿親試考擊皆合五音群臣稱慶休烈尋轉工部侍郎修國史獻五代帝王論帝甚嘉之宰相李揆矜能忌賢以休烈修國史與已齊列嫉之奏爲國子祭酒權留史館

修撰以下之休烈恬然自持殊不介意舊儀元正冬至百官不於光順門朝賀皇后乾元元年張皇后遂行此禮休烈奏曰周禮有命夫朝人主命婦朝女君自顯慶已來則天皇后始行此禮其日命婦又朝光順門與百官雜處殊爲失禮肅宗詔停之代宗即位甄別名品宰臣元載稱之乃拜右散騎常侍依前兼修國史尋加禮儀使遷工部侍郎又改檢校工部尚書兼判太常卿事正拜工部尚書累封東海郡公加金紫光祿大夫在朝凡三十餘年歷掌清要家無擔石之蓄恭儉溫仁未嘗以喜愠形於顏色而親賢下士推轂後進雖位崇年高曾無倦色篤好墳籍手不釋卷以至于終大曆七年卒年八十一有集十卷行於代嗣子益次子肅相繼爲翰林學士是歲春休烈妻韋氏卒上以休烈父子儒行著聞特詔贈韋氏國夫人葬日給鹵簿鼓吹及聞休烈卒追悼久之褒贈尚書左僕射賻絹百匹布五十端遣謁者內常侍吳承倩就私第宣慰儒者之榮少有其比肅官至給事中肅子敖

教字蹈中以家世文史盛名少爲時彥所稱志行修謹登進士第釋褐祕書省校書郎湖南觀察使楊憑辟憑從事府罷鳳翔節度使李鄘鄂岳觀察使呂元膺相繼辟召自協律郎大理評事試監察御史元和六年真拜監察御史轉殿中歷倉部司勳二員外萬年令拜右司郎中出爲商州刺史長慶四年入爲吏部郎中其年遷給事中昭愍初即位李逢吉用事與翰林學士李紳素不叶遂誣紳以不測之罪逐於嶺外紳同職駕部郎中知制誥龐嚴司封員外郎知制誥蔣防坐紳黨左遷信汀等州刺史黜詔下赦封還詔書時人以爲與嚴相善訴其非罪皆曰于給事犯宰執之怒伸龐蔣之屈不亦仁乎及駁奏出乃是論龐嚴貶黜太輕中外無不大噱而逢吉由是獎之尋轉工部侍郎遷刑部出爲宣歙觀察使兼御史中丞赦溫裕長者與物無忤居官亦未嘗有立周踐臺閣三爲列曹侍郎謹順自容而已太和四年八月卒年六十六贈禮部尚書四子球珪瓌琮皆登進士第

琮落托有大志雖以門資爲吏久不見用大中朝駙馬都尉鄭顥以琮世故獨以器度奇之會有詔於士族中選人才尚公主衣冠多避之顥謂琮曰子人才甚佳但不護細行爲世譽所抑久而不調能應此命乎琮然之會李藩知貢舉顥託之登第其年遂升諫列尚廣德公主拜駙馬都尉累踐臺閣揚歷藩府乾符中同平章事黃寇犯京師僖宗出幸琮病不能從旣僭號起琮爲相琮以疾辭迫脅不已琮曰吾病亟矣死在旦夕加以唐室親姻義不受命死即甘心竟爲賊所害而赦公主主視琮受禍謂賊曰妾李氏女也義不獨存願與干公并命賊不許公主入室自縊而卒廣德閨門有禮咸通乾符中譽在人口于族内外冠婚喪祭主必自預行禮諸婦班而見之尊卑荅勞咸有儀法爲時所稱珪球皆至清顯

令狐峒德棗之玄孫登進士第祿山之亂隱居南山豹林谷谷中有峒別墅司徒楊綰未仕時避亂南山止於峒舍峒博學貫通群書有口辯綰甚稱之及綰爲禮部侍郎修國史乃引峒入史館自華原尉

拜右拾遺累遷起居舍人皆兼史職修玄宗實錄一百卷代宗實錄四十卷著述雖勤屬大亂之後起居注亡失岷纂開元天寶事雖得諸家文集編其詔策名臣傳記十無三四後人以漏落處多不稱良史大曆八年改刑部員外郎德宗即位將厚奉元陵岷上疏諫曰臣聞傳曰近臣盡規禮記曰事君有犯而無隱臣幸偶昌運謬忝近列敢竭狂愚庶裨分寸伏惟陛下詳察臣讀漢書劉向傳見論王者山陵之誠良史稱歎萬古芬芳何者聖賢之心勤儉是務必求諸道不作無益故舜葬蒼梧不變其肆禹葬會稽不改其列周武葬于畢陌無丘壠之處漢文葬於霸陵因山谷之勢禹非不忠也啓非不順也周公非不悌也景帝非不孝也其奉君親皆從微薄昔宋文公始爲厚葬用蜃炭益車馬其臣華元樂舉春秋書爲不臣秦始皇葬驪山魚膏爲燈燭水銀爲江海珍寶之藏不可勝計千載非之宋相黜爲石槨夫子曰不如速朽子游問喪且夫子曰稱家之有無張釋之對孝文曰使其中無可欲雖無石槨又何戚焉漢文帝霸陵皆以瓦器

不以金銀爲飾由是觀之有德者葬逾薄無德者葬逾厚昭然可觀矣陛下自臨御天下聖政日新進忠去邪減膳節用不珍雲物之瑞不近鷹犬之娛有司給物悉依元估利於人也遠方底貢唯供祀事薄於已也故澤州奏慶雲詔曰以時和爲嘉祥邕州奏金坑詔曰不貪爲珪恭惟聖慮無非至理而獨六月一日制節文云應緣山陵制度務從優厚當竭帑藏以供費用者此誠仁孝之德切於聖衷伏以尊親之義貴於合禮陛下每下明詔發德音皆比蹤唐虞超邁周漢豈取悅凡常之目有違賢哲之心與失德之君競其奢侈者也臣又伏讀遺詔曰其喪儀制度務從儉約不得以金銀錦綵爲飾陛下恭順先志動無違者若制度優厚豈顧命之意耶伏惟陛下遠覽虞夏周漢之制深惟夫子張釋之誠虔奉先旨俯尊禮經爲萬代法天下幸甚今敕書雖已頒行諸條尚猶未出此時奉遺制敷聖理固未晚也伏望速詔有司悉從古禮臣聞愚夫之言明主擇焉況臣忝職史官親逢睿德取同華元樂舉之爲不臣也願以舜禹之理紀聖猷也

夙夜懇迫不敢不言抵犯聖明實憂罪譴言行身黜雖死猶生優詔
荅曰朕頃議山陵心方迷謬忘遵先旨遂有優厚之文卿聞見該通
識度弘遠深知不可形於至言援引古今依據經禮非唯中朕之病
抑亦成朕之躬免朕獲不子之名皆卿之力也敢不聞義而徙牧之
桑榆奉以始終期無失墜古之遺直何以加焉初大曆中劉晏爲吏
部尚書楊炎爲侍郎晏用峒判吏部南曹事峒荷晏之舉每分闕必
擇其善者送晏不善者送炎炎心不平之及建中初峒爲禮部侍郎
炎爲宰相不念舊事有士子杜封者故相鴻漸子求補弘文生炎嘗
出杜氏門下託封於峒峒謂使者曰相公誠憐封欲成一名乞署封
名下一字峒得以志之炎不意峒賣即署名託封峒以炎所署奏論
言宰相迫臣以私臣若從之則負陛下不從則炎當害臣德宗出䟽
問炎炎具言其事德宗怒甚曰此姦人無可奈何欲決杖流之炎苦
救解貶衡州別駕遷衡州刺史貞元中李泌輔政召拜右庶子史館
修撰性既僻異動失人和在史館與同職孔述睿等爭忿細故數侵

迷睿迷睿長者讓而不爭無何必卒竇叅秉政惡其爲人貶吉州別駕久之授吉州刺史齊映廉察江西行部過吉州故事刺史始見觀察使皆戎服趨庭致禮映雖嘗爲宰相然驟達後進岍自恃前輩有以過映不欲以戎服謁入告其妻韋氏恥抹首趨庭謂岍曰卿自視何如人白頭走小生前卿如不以此禮見映雖黜死我亦無恨岍曰諾即以客禮謁之映雖不言深以爲憾映至州奏岍紕前政過失鞠之無狀不宜按部臨人貶衢州別駕衢州刺史田敦岍知舉時進士門生也初岍當貢部放牒日貶逐與敦不相面敦聞岍來喜曰始見座主迎謁之禮甚厚敦月分俸之半以奉岍岍在衢州殆十年順宗即位以秘書少監徵旣至而卒元和三年岍子太僕寺丞丕始獻岍所撰代宗實錄四十卷初岍坐李泌貶監修國史奏岍所撰實錄一分請於貶所畢功至是方奏以功贈工部尚書

歸崇敬字正禮蘇州吳郡人也曾祖奧以崇敬故追贈秘書監祖樂贈房州刺史父待聘亦贈秘書監崇敬少勤學以經業擢第遭喪哀

毀以孝聞調授四門助教天寶末對策高第授左拾遺改秘書郎遷起居郎贊善大夫兼史館修撰又加集賢殿校理以家貧求爲外職歷同州潤州長史會玄宗肅宗二帝山陵叅掌禮儀遷主客員外郎又兼史館修撰改膳部郎中崇敬以百官朔望朝服袴褶非古上疏云按三代典禮兩漢史籍並無袴褶之制亦未詳所起之由隋代已來始有服者事不師古伏請停罷從之又諫東都太廟不合置木主謹按典禮虞主用桑練主用栗作桑主則埋栗主作栗主則埋桑主所以神無二主天無二日土無二王也東都太廟是則天皇后所建以置武氏木主中宗去其主而存其廟蓋將以備行幸遷都之置也且殷人屢遷前八後五則前後遷都一十三度不可每都而別立神主也議者或云東都神主已曾虔奉而禮之豈可一朝廢之乎且虞祭則立桑主而虔祀練祭則立栗主而埋桑主豈桑主不曾虔祀而乃埋之又所闕之主何須更作作之不時恐非禮也又議云每年春秋二時釋奠文宣王祝板御署訖北面揖臣以爲禮太重謹按大戴

禮師尚父授周武王丹書武王東面而立今畧祝板伏請準武王東面之禮輕重庶得其中時有術士巨彭祖上疏云大唐土德千年合符請每四季郊祀天地詔禮官儒者議之崇敬議曰按舊禮立春之日迎春於東郊祭青帝立夏之日迎夏於南郊祭赤帝先立秋十八日迎黃靈於中地祀黃帝秋冬各如其方黃帝於五行爲土王在四季生於火故火用事之末而祭之三季則否漢魏周隋共行此禮國家土德乘時亦以每歲六月土王之日祀黃帝於南郊以后土配所謂合禮今彭祖請用四季祠祀多憑緯候之說且據陰陽之說事涉不經恐難行用又議祭五人帝不稱臣云太昊五帝人帝也於國家即爲前後之禮無君臣之義若於人帝而稱臣則於天帝復何稱也議者或云五人帝列於月令分配五時則五神五音五祀五蟲五臭皆備五穀以備其時之色數非謂別有尊崇也又請太祖景皇帝配天事已具禮儀志自是國典大禮崇敬常叅議焉大曆初以新羅王卒授崇敬倉部郎中兼御史中丞賜紫金魚袋充弔祭冊立新羅使

至海中流波濤迅急舟船壞漏衆咸驚駭舟人請以小艇載崇敬避禍崇敬曰舟中凡數十百人我何獨濟遂巡波濤稍息竟免爲害故事使新羅者至海東多有所求或携資帛而往貿易貨物規以爲利崇敬一皆絕之東夷稱重其德使還授國子司業兼集賢學士與諸儒官同修通志崇敬知禮儀志衆稱允當時皇太子欲以仲秋之月於國學行齒胄之禮崇敬以國學及官名不稱請改國學之制兼更其名曰禮記王制曰天子學曰辟雍又五經通義云辟雍養老教學之所也以形制言之雍壅也辟壁也壅水環之圓如壁形以義理言之辟明也雍和也言以禮樂明和天下禮記亦謂之澤宮射義云天子將祭必先習射於澤宮故前代文士亦呼云壁池亦曰壁沼亦謂之學省後漢光武立明堂辟雍靈臺謂之三雍宮至明帝躬行養老於其中晉武帝亦作明堂辟雍靈臺親臨辟雍行鄉飲酒之禮又別立國子學以殊士庶永嘉南遷唯有國子學不立辟雍北齊立國子寺隋初亦然至煬帝大業十三年改爲國子監今國家富有四海聲

明文物之盛唯辟雍獨闕伏請改國子監爲辟雍省又以祭酒之名
非學官所宜按周禮師氏掌以義詔王敎國子請改祭酒爲太師氏
位正三品又司業者義在禮記云樂正司業正長也言樂官之長司
主此業爾雅云大板謂之業按詩周頌設業設簋崇牙樹羽則業是
懸鍾磬之拘簠也今太學既不敎樂於義則無所取請改司業一爲
左師一爲右師位正四品上又以五經六籍古先哲王致理之式也
國家創業制取賢之法立明經發微言於衆學釋回增美選賢與能
自艱難已來取人頗易考試不求其文義及第先取於帖經遂使專
門業廢請益無從師資禮虧傳受義絕今請以禮記左傳爲大經周
禮毛詩爲中經尚書周易爲小經各置博士一員其公羊穀梁文疏
少請共準一中經通置博士一員所擇博士兼通孝經論語依憑章
疏講解分明注引旁通問十得九兼德行純潔文詞雅正儀形規範
可爲師表者令四品以上各舉所知在外者給驛年七十已上者蒲
輪其國子太學四門三館各立五經博士品秩上下生徒之數各有

差其舊博士助教直講經直及律館算館助教請皆罷省其教授之法學生至監謁同業師其所執贄脯脩一束清酒一壺衫布一段其色隨師所服師出中門延入與坐割脩斟酒三爵而止乃發篋出經摺衣前請師爲依經辨理略舉一隅然後就室每朝晡二時請益師亦二時居講堂說釋道義發明大體兼教以文行忠信之道示以孝悌睦友之義旬省月試時考歲貢以生徒及第多少爲博士考課上下其有不率教者則櫟楚朴之國子不率教者則申禮部移爲太學太學之不變者移之四門四門之不變者歸本州之學州學之不變者復本役終身不齒雖率教九年而學不成者亦歸之州學其禮部考試之法請無帖經但於所習經中問大義二十得十八爲通兼論語孝經各問十得八兼讀所問文注義疏必令通熟者爲一通又於本經問時務策三道通二爲及第其中有孝行聞於鄉閭者舉解具言於習業之下省試之日觀其所實義少兩道亦請兼收其天下鄉貢亦如之習業考試並以明經爲名得第者授官之資與進士同若

此則教義日深而禮讓興禮讓興則強不犯弱眾不暴寡此由太學之來者也詔下尚書集百寮定議以聞議者以爲省者禁也非外司所宜名周禮代掌其職者曰氏國學非代官不宜曰太師氏其餘大抵以習俗旣久重難改作其事不行會國學胥吏以餐錢差舛御史臺按問坐貶饒州司馬建中初又拜國子司業尋選爲翰林學士遷左散騎常侍加銀青光祿大夫尋兼普王元帥叅謀累加光祿大夫以兩河叛換之徙初稟朝命今崇敬以本官兼御史大夫持節宣慰奉使稱旨及還上表請歸拜墓許之賜以繒帛儒者榮之尋加特進檢校戶部尚書遷工部尚書並依前翰林學士充皇太子侍讀累表辭以年老乞骸骨改兵部尚書致仕貞元十五年卒時年八十廢朝一日贈左僕射子登嗣

登字冲之雅實弘厚事繼母以孝稱大曆七年舉孝廉高第補四門助教貞元初復登賢良科自美原尉拜右拾遺時裴延齡以姦佞有恩欲爲相諫議大夫陽城上䟽切直德宗赫怒右補闕熊執易等亦

以危言忤旨初執易草䟽成示登登愕然曰願寄一名雷電之下安忍令足下獨當自是同列切諫登每聯署其奏無所迴避時人稱重轉右補闕起居舍人三任十五年同列嘗出其下者多以馳驚至顯官而登與右拾遺蔣武退然自守不以淹速介意後遷兵部員外郎充皇子侍讀尋加史館修撰順宗初以東朝舊恩超拜給事中旋賜金紫仍錫衫笏焉遷工部侍郎與孟簡劉伯芻蕭俛受詔同翻譯大乘本生心地觀經又爲東宮及諸王侍讀獻龍樓箴以諷久之改左散騎常侍因中謝憲宗問時所切登以納諫爲對時論美之轉兵部侍郎兼判國子祭酒事遷工部尚書元和十五年卒年六十七贈太子少保登有文學工草隸寬博容物嘗使僮飼馬馬蹄踣僮怒擊折馬足登知而不責晚年頗好服食有饋金石之藥者且云先嘗之矣登服之不疑藥發毒幾死方訊云未之嘗他人爲之怒登視之無愠色常慕陸象先之爲人議者亦以爲近之子融嗣

融進士擢第自監察拾遺入省拜工部員外郎遷考功員外六年轉

工部郎中充翰林學士八年正拜舍人九年轉戶部侍郎開成元年兼御史中丞湖南觀察使盧周仁違勅進羨餘錢十萬貫融奏曰天下一家何非君土中外財賦皆陛下府庫也周仁輒陳小利妄設異端言南方火災恐成灰燼進於京國姑徇私誠入財貨以希恩待朝廷而何淺臣恐天下放效以羨餘爲名因緣刻剥生人受弊周仁請行重責以例列藩其所進錢請還湖南代貧下租稅詔周仁所進於河陰院收貯以備水旱金部員外郎韓益判度支案子弟受人賂三千餘貫半是擬贓上問融曰韓益所犯與盧元中姚康孰甚對曰元中與康枉破官錢三萬餘貫益所取受人事比之殊輕乃貶梧州司戶尋遷京兆尹時府司物力不充特勅賜錢五萬貫府司以所賜之半還司農寺菜錢融因對言之上以融學家因問蔬糲字有賴音何也糲是飯之極麤者耶融以義類對之時兩公主出降府司供帳事殷又附近上已曲江賜宴奏請改日上曰去年重陽取九月十九日未失重陽之意今改取十三日可也旣而李固言作相素不悅融罷

尹月餘授秘書監俄而固言罷楊嗣復輔政以融權知兵部侍郎一
年內拜吏部三年檢校禮部尚書興元尹兼御史大夫充山南西道
節度使融子仁晦仁翰仁憲仁召仁澤皆登進士第咸通中並至達
官

奚陟字殷卿亳州人也祖乾繹天寶中弋陽郡太守陟少好讀書登
進士第又登制舉文詞清麗科授弘文館校書尋拜大理評事佐入
吐蕃使不行授左拾遺丁父母憂哀毀過禮親朋愍之車駕幸興元
召拜起居郎翰林學士辭以疾病久不赴職改太子司議郎歷金部
吏部員外郎左司郎中彌綸省闋又累奉使皆稱旨貞元八年擢拜
中書舍人是歲江南淮西大雨爲災令陟勞問巡慰所在人安悅之
中書省故事姑息胥徒以常在宰相左右也陟皆以公道處之先是
右省雜給率分等第皆據職田頃畝即王書所受與右史等陟乃約
以料錢爲率自是主書所得減拾遺時中書令李晟所請紙筆雜給
皆不受但告雜事舍人令且貯之他日便悉以遺舍人前例雜事舍

人自攜私入陟以所得均分省內官又躬親庶務下至園蔬皆悉自點閱人以爲難陟處之無倦遷刑部侍郎裴延齡惡京兆尹李充有能政專意陷害之誣奏充結陸贄數厚賂遺金帛充旣貶官又奏充比者妄破用京兆府錢穀至多請令比部勾覆以比部郎中崔元翰陷充怨惡贄也詔許之元翰曲附延齡劾治府史府史到者雖無過犯皆笞決以立威時論喧然陟迺躬自閱視府案具得其實奏言據度支奏京兆府貞元九年兩稅及已前諸色羨餘錢共六十八萬餘貫李充並妄破用今所勾勘一千二百貫已來是諸縣供館驛加破及在諸色人戶腹內合收其斛斗共三十二萬石唯三百餘石諸色輸納所由欠折其餘並是準勅及度支符牒給用已盡陟之寬平守法多如此類元翰旣不遂其志因此憤恚而卒陟尋以本官知吏部選事銓綜平允有能名遷吏部侍郎所莅之官時以爲稱職貞元十五年卒年五十五贈禮部尚書

張薦字孝舉深州陸澤人祖鶯字文成聰敏言絕倫書無不覽爲兒童

時夢紫色文鳥五彩成文降于家庭其祖謂之曰五色赤文鳳也紫
文鸞鸞也爲鳳之佐吾兒當以文章瑞於明廷因以爲名字初登進
士第對策尤工考功員外郎蹇味道賞之曰如此生天下無雙矣調
授岐王府叅軍又應下筆成章及才高位下詞標文苑等科鸞凡應
八舉皆登甲科再授長安尉遷鴻臚丞凡四叅選判策爲銓府之最
員外郎員半千謂人曰張子之文如青錢萬簡選中未聞退時時流
重之目爲青錢學士然性褊躁不持士行尤爲端士所惡姚崇甚薄
之開元初澄正風俗鸞爲御史李全交所紿言鸞語多譏刺時坐貶
嶺南刑部尚書李日知奏論乃追勅移於近處開元中入爲司門員
外郎卒鸞下筆敏速著述尤多言頗詼諧是時天下知名無賢不肖
皆記誦其文天后朝中使馬仙童陷默啞默啞謂仙童曰張文成在
否曰近自御史貶官默啞曰國有此人而不用漢無能爲也新羅日
本東夷諸蕃尤重其文每遣使入朝必重金貝以購其文其才名
遠播如此薦少精史傳顏真卿一見歎賞之天寶中浙西觀察使李

涵表薦其才可當史任乃詔授左司禦率府兵曹叅軍既至闕下以
母老疾竟不拜命母喪闋禮部侍郎于邵舉前事以聞召充史館修
撰兼陽翟尉朱泚之亂變姓名伏匿城中因著史遁先生傳德宗還
宮擢拜左拾遺貞元元年冬上親郊時初克復簿籍多失禮文錯亂
乃以薦爲太常博士叅典禮儀四年迴紇和親以檢校右僕射刑部
尚書關播充使送咸安公主入番以薦爲判官轉殿中侍御史使還
轉工部員外郎改戶部本司郎中十一年拜諫議大夫仍充史館修
撰時裴延齡恃寵譖毀士大夫薦欲上書論之屢揚言未果延齡聞
之怒奏曰諫官論朝政得失史官書人君善惡則領史職者不宜兼
諫議德宗以爲然薦爲諫議月餘改秘書少監延齡排擯不已會差
使冊迴紇毗伽懷信可汗及弔祭乃命薦兼御史中丞入迴紇二十
年吐蕃贊普死以薦爲工部侍郎兼御史大夫充入吐蕃弔祭使涉
蕃界二千餘里至赤嶺東被病歿於紇壁驛吐蕃傳其柩以歸順宗
即位凶問至詔贈禮部尚書薦自拾遺至侍郎僅二十年皆兼史館

修撰三使絕域皆兼憲職以博洽多能敏於占對被選有文集三十卷及所撰五服圖宰相略靈怪集江左寓居錄等並傳于時子又新同希復皆登進士第又新幼工文善於傳會長慶中宰相李逢吉用事翰林學士李紳深爲穆宗所寵逢吉惡之求朝臣中兇險敢言者倚撫紳陰事俾暴揚於搢紳間又新與拾遺李續之劉棲楚尤蒙逢吉睠待指爲鷹犬穆宗崩昭愍初即位又新等構紳貶端州司馬朝臣表賀又至中書賀宰相及門門者止之曰請少留緣張補闕在齋內與相公談俄而又新揮汗而出旅揖群官曰端溪之事又新不敢多讓人皆辟易憚之與續之等七人時號八關十六子寶曆三年逢吉出爲山南東道節度使請又新爲副使李續之爲行軍司馬逢吉爲宰相時用門下省主事田伾伾犯賊亡命逢吉保之于外及罷相裴度發其事逢吉坐罰俸又詔曰朕在億兆人之上不令而人化不言而人信者法也法行則君主重法廢則朝廷輕田伾常挂亡命之章偷請養賢之祿迹在搜捕公行人間而更冒選吏曹顯擬郡佐及

黃樞覆驗烏府追擒證逮皆明姦狀盡得三移憲牒一無申陳衆狀滿前群議溢耳終則步健不至琅璫空來蔑視紀綱頗同侮謔顧茲叅畫負我上台閱視連名伊爾二子又新可汀州刺史李續之可涪州刺史及逢吉致仕李訓用事復召二子爲尚書郎訓敗復貶而卒希復子讀登進士第有俊才累官至中書舍人禮部侍郎典貢舉時稱得士位終尚書左丞

蔣乂字德源常州義興人也祖瓌太子洗馬開元中弘文館學士父將明累遷至左司郎中國子司業集賢殿學士副知院事代爲名儒而又史官吳兢之外孫以外舍富墳史幼便記覽不倦七歲時誦庾信哀江南賦數徧而成誦在口以聰悟強力聞於親黨間弱冠博通群籍而史才尤長其父在集賢時以兵亂之後圖籍溷雜乃白執政請攜乂入院令整比之宰相張鎰見而奇之乃署爲集賢小職乂編次踰年於亂中勒成部帙得二萬餘卷再遷王屋尉充太常禮院修撰貞元九年轉右拾遺充史館修撰十三年以故河中節度使張茂

昭弟光祿少卿同正茂宗尚義章公主茂宗方居母喪有詔起復雲
麾將軍成禮詔下又上疏諫曰墨纓之禮本綠金革從古已來未有
駙馬起復尚主者旣乖典禮且違人情切恐不可上令中使宣諭云
茂宗母臨亡有請重違其心又又拜疏辭逾激切德宗於延英特召
入對上曰卿所言古禮也朕聞如今人家往往有借吉爲婚嫁者卿
何苦固執對曰臣聞里俗有不甚知禮法者或女居父母服內家旣
貧匱旁無至親即有借吉以就禮者男子借吉而娶臣未嘗聞之況
陛下臨御已來每事憲章典禮建中年郡縣主出降皆詔有事依禮
不用俗儀天下慶戴忽今駙馬起復成禮實恐驚駭物聽臣或聞公
主年甚幼小即更俟一年出降時旣未失且合禮經實天下幸甚上
曰卿言甚善更俟商量俄而韋彤裴堪諫疏繼入上不悅促令奉行
前詔然上心頗重又上嘗登凌煙閣見左壁頽剥文字殘缺每行僅
有三五字命錄之以問宰臣宰臣遽受宣無以對即令召又至對曰
此聖曆中侍臣圖贊臣皆記憶即於御前口誦以補其缺不失一字

上歎曰虞世南暗寫列女傳無以加也十八年遷起居舍人轉司勳
員外郎皆兼史職時集賢學士甚衆會詔問神策軍建置之由相府
計求不知所出諸學士悉不能對乃訪於又又徵引根源事甚詳悉
宰臣高郢鄭珣瑜相顧曰集賢有人矣翌日詔兼判集賢院事父子
代爲學士儒者榮之時順宗祔廟將行祔遷之禮詔公卿議咸云中
宗中興之主不當遷又建議云中宗旣正位柩前乃受母后篡奪五
王翼戴方復大業此乃由我失之因人得之止可同於返正不得號
爲中興群議紛然竟依又所執元和二年遷兵部郎中與許孟容韋
貫之等受詔刪定制勅成三十卷奏行用改秘書少監復兼史館修
撰尋奉詔與獨孤郁韋處厚同修德宗實錄五年書成奏御以功拜
右諫議大夫明年監修國史裴垍罷相李吉甫再入以又垍之修撰
改授太常少卿久之遷秘書監又性朴直不能事人或遇權臣專政
輒數歲不遷官在朝垂三十年前後每有大政事大議論宰執不能
裁決者必召以咨訪又徵引典故以叅時事多合其宜然亦以此自

滯而好學不倦老而彌篤雖甚寒暑手不釋卷旁通百家尤精歷代
公華家藏書一萬五千卷本名武因憲宗召對奏曰陛下已誅群寇
偃武修文臣名於義未允請改名又上忻然從之時帝方用兵兩河
又亦因此諷諭耳又居史任二十年所著大唐宰相錄七十卷凌煙
閣功臣秦府十八學士史臣等傳四十卷長慶元年卒年七十五贈
禮部尚書諡曰懿子係伸偕仙佶係大和初授昭應尉直史館二年
拜右拾遺史館修撰典實有父風與同職沈傳師鄭澣陳夷行李漢
等受詔撰憲宗實錄四年書成奏御轉尚書工部員外遷本司郎中
皆兼史職宰相宋申錫爲北軍羅織罪在不測係與諫官崔玄亮泣
諫於玉階之下申錫亦減死時論稱之開成中轉諫議大夫武宗朝
李德裕用事以係與漢僚胥出爲桂管都防禦觀察使宣宗即位徵
拜給事中集賢殿學士判院事轉吏部侍郎改左丞出爲興元節度
使入爲刑部尚書俄檢校戶部尚書鳳翔尹充鳳翔節度使入爲
兵部尚書以弟伸爲丞相懇辭相秩檢校尚書左僕射襄州刺史山

南東道節度使封淮陽縣開國公食邑五百戶

伸登進士第歷佐使府大中初入朝右補闕史館修撰轉中書舍人召入翰林爲學士自貢外郎中至戶部侍郎學士丞言轉兵部侍郎大中末中書侍郎平章事仙佶皆至刺史借有史才以父任歷官左拾遺史館修撰轉補闕咸通中與同職盧耽牛叢等受詔修文宗實錄蔣氏世以儒史稱不以文藻爲事唯伸及係子兆有文才登進士第然不爲文士所譽與柳氏沈氏父子相繼修國史實錄時推良史京師云蔣氏日曆士族靡不家藏焉

柳登字成伯河東人父芳肅宗朝史官與同職韋述受詔添修吳兢所撰國史殺青未竟而述亡芳緒述凡例勒成國史一百三十卷上自高祖下止乾元而敘天寶後事絕無倫類取捨非工不爲史氏所稱然芳勤於記註含毫罔倦屬安史亂離國史散落編綴所聞率多闕漏上元中坐事徙黔中遇內官高力士亦貶巫州遇諸途芳以所疑禁中事咨於力士力士說開元天寶中時政事芳隨口志之又以

國史已成經於奏御不可復改乃別撰唐曆四十卷以力士所傳載於年曆之下芳自永寧尉直史館轉拾遺補闕員外郎皆居史任位終右司郎中集賢學士少嗜學與弟冕咸以該博著稱登年六十餘方從宦遊累遷至膳部郎中元和初爲大理少卿與刑部侍郎許孟容等七人奉詔刪定開元已後勅格再遷右庶子以衰病改秘書監不拜授右散騎常侍致仕長慶二年卒時九十餘輟朝一日贈工部尚書弟冕

冕文史兼該長於吏職貞元初爲太常博士二年昭德王皇后之喪論皇太子服紀左補闕穆質請依禮周朞而除冕與同職張薦等奏議曰準開元禮子爲母齊縗三年此王公已下服紀皇太子爲皇后喪服國禮無聞昔晉武帝元皇后崩其時亦疑太子所服杜元凱奏議曰古者天子三年之喪旣葬除服魏氏革命亦以旣葬爲節故天子諸侯之禮嘗已具矣惡其害已而削去其籍今其存者唯士喪禮一篇戴勝之記錯雜其內亦難以取正皇太子配二尊與國爲體固

宜卒哭而除服於是山濤魏舒並同其議晉朝從之歷代遵行垂之
不朽臣謹按實錄文德皇后以貞觀十年九月崩十一月葬至十一
年正月除晉王治爲并州都督晉王即高宗在藩所封文德皇后幼
子據其命官當已除之義也今請皇太子依魏晉故事爲大行皇后
喪服葬而虞虞而卒哭卒哭而除心喪終制庶存厭降之禮事下中
書宰臣召問禮官曰語云子食於有喪者之側未嘗飽也今豈可令
皇太子縗服侍膳至於旣葬乎準今羣臣齊縗給假三十日即公除
約於此制更審議之張薦曰請依宋齊間皇后爲父母服三十日公
除例爲皇太子喪服之節薦旣以公除詣於正內則服墨慘歸至本
院縗麻如故穆質曰杜元凱旣葬除服之論不足爲法臣愚以爲遵
三年之制則太重從三十日之變太輕唯行古之道以周年爲定詔
宰臣與禮官定可否宰臣以穆質所奏問博士冕對曰準禮三年喪
無貴賤一也豈以有父母貴賤而差降喪服之節乎且禮有公門脫
齊縗開元禮皇后爲父母服十三月其稟朝旨十三日而除皇太子

爲外祖父母服五月其從朝旨則五日而除所以然者恐喪服侍奉有傷至尊之意也故從權制昭著國章公門脫縗義亦在此豈皆爲金革乎皇太子今若抑哀公除墨慘朝覲歸至本院依舊縗麻酌於變通庶可傳繼宰臣然其議遂命太常卿鄭叔則草奏以冕議爲是而穆質堅執前議請依古禮不妨太子墨縗於內也宰臣齊映劉滋叅酌群議請依叔則之議制從之及董晉爲太常卿德宗謂之曰皇太子所行周服非朕本意有諫官橫論之今熟計之即禮官請依魏晉故事斯甚折衷明年冬上以太子久在喪合至正月晦受吉服欲以其年十一月釋衰麻以及新正稱慶有司皆論不可乃止六年十一月上親行郊享上重慎祀典每事依禮時冕爲吏部郎中攝太常博士與司封郎中徐岱倉部郎中陸質工部郎中張薦皆攝禮官同修郊祀儀注以備顧問初詔以皇太子亞獻終獻當受誓戒否冕對曰準開元禮有之然誓詞云不供其職國有常刑今太子受誓請改云各揚其職肅奉常儀上又問升郊廟去劒履及象劒尺寸之度視

文輕重之宜冕據禮經公革聞奏上甚嘉之冕言事頗切執政不便
之出爲婺州刺史十三年兼御史中丞福州刺史充福建都團練觀
察使冕在福州奏置萬安監牧於泉州界置群牧五悉索部內馬五
千七百匹驢騾牛八百頭羊三千口以爲監牧之資人情大擾暮年
無所滋息詔罷之以政無狀詔以閔濟美代歸而卒子璟登進士第
亦以著述知名

璟寶曆初登進士第三遷監察御史時郊廟告祭差攝三公行事多
以雜品璟時監祭奏曰準開元二十三年勅宗廟大祠宜差左右丞
相嗣王特進少保少傅尚書賓客御史大夫又二十五年勅太廟五
享差丞相師傅尚書嗣郡王通攝餘司不在差限又元和四年勅太
廟告祭攝官太尉以宰相充其攝司空司徒以僕射尚書師傅充餘
司不在差限比來吏部因循不守前後勅文用人稍輕請自今年冬
季勒吏部準開元元和勅例差官從之再遷度支員外郎轉吏部開
成初換庫部員外郎知制誥尋以本官充翰林學士初璟祖芳精於

譜學末泰中按宗正譜謀自武德已來宗枝昭穆相承撰皇室譜二十卷號曰永泰新譜自後無人修續璟因召對言及圖譜事文宗曰卿祖嘗爲皇家圖譜朕昨觀之甚爲詳悉卿檢永泰後試修續之璟依芳舊式續德宗後事成十卷以附前譜仍詔戶部供紙筆厨料五年拜中書舍人充職武宗朝轉禮部侍郎再司貢籍時號得人子韜亦以進士擢第

沈傳師字子言吳人父旣濟博通群籍史筆尤工吏部侍郎楊炎見而稱之建中初炎爲宰相薦旣濟才堪史任召拜左拾遺史館修撰旣濟以吳兢撰國史以則天事立本紀奏議非之曰史氏之作本乎懲勸以正君臣以維家邦前端千古後法萬代使其生不敢差死不妄懼緯人倫而經世道爲百王準的不止屬辭比事以日繫月而已故善惡之道在乎勸誡勸誡之柄存乎褒貶是以春秋之義尊卑輕重升降幾微髣髴雖一字二字必有微旨存焉況鴻名大統其可以貸乎伏以則天皇后初以聰明睿哲內輔時政厥功茂矣及弘道之

際孝和以長君嗣位而太后以專制臨朝俄又廢帝或幽或徙旣而握圖稱錄移運革名牝伺驚啄之蹤難乎備述其後五王建策皇運復興議名之際得無降損必將義以親隱禮從國諱苟不及損當如其常安可橫絕彝典超居帝籍昔仲尼有言必也正名故夏殷二代爲帝者三十世矣而周人通名之曰王吳楚越之君爲王者百餘年而春秋書之爲子蓋高下自乎彼而是非稭乎我過者抑之不及者援之不爲弱減不爲僭奪握中持平不振不傾使其求不可得而蓋不可掩斯古君子所以慎其名也夫則天體自坤順位居乾極以柔乘剛天紀倒張進以強有退非德讓今史臣追書當稱之太后不宜曰上孝和雖迫母后之命降居藩邸而體元繼代本吾君也史臣追書宜稱曰皇帝不宜曰廬陵王睿宗在景龍已前天命未集徒稟后制假臨大寶於倫非次於義無名史臣書之宜曰相王未宜曰帝若以得失旣往遂而不舉則是非褒貶安所辨正載筆執簡謂之何哉則天廢國家曆數用周正朔廢國家太廟立周七廟鼎命革矣徽號

易矣旂裳服色旣已殊矣今安得以周氏年曆而列爲唐書帝紀徵諸禮經是謂亂名且孝和繼天踐祚在太后之前而敘年製紀居太后之下方之躋僖是謂不智詳今考古並未爲可或曰班馬良史也編述漢事立高后以續帝載豈有非之者乎荅曰昔高后稱制因其曠嗣獨有分王諸呂負於漢約無遷鼎革命之甚況其時孝惠已歿孝文在下宮中二子非劉氏種不紀吕后將紀誰焉雖云其然議者猶爲不可況遷鼎革命者乎或曰若天后不紀帝緒缺矣則二十二年行事何所繫乎曰孝和以始年登大位以季年復舊業雖尊名中奪而天命未改足以首事足以表年何所拘闕裂爲二紀昔魯昭之出也春秋歲書其居曰公在乾侯且君在雖失位不敢廢也今請併天后紀合孝和紀每於歲首必書孝和所在以統之書曰其年春正月皇帝在房陵太后行某事改某制云云則紀稱孝和而事述太后俾名不失正而禮不違常名禮兩得人無間矣其姓氏名諱入宮之由歷位之資才藝智略年辰崩葬別纂錄入皇后傳列於廢后王庶

人之下題其篇曰則天順聖武后云事雖不行而史氏稱之德宗初
即位銳於求理建中二年夏勅中書門下兩省分置待詔官三十員
以見官前任及同正試攝九品已上擇文學理道韜鈴法度之深者
爲之各準品秩給俸錢廩餼幹力什器館宇之設以公錢爲之本收
息以贍用物論以爲兩省皆名侍臣足備顧問無勞別置冗員既濟
上疏論之曰臣伏以陛下今日之理患在官煩不患員少患在不問
不患無人且中書門下兩省常侍諫議補闕拾遺揔四十員及常叅
待制之官日有兩人皆備顧問亦不少矣中有二十一員尚闕人未
充他司缺職累倍其數陛下若謂見官非才不足與議則當選求能
者以代其人若欲務廣聰明畢收淹滯則當擇其可者先補缺員則
朝無曠官俸不徒費且夫置錢息利是有司權宜非陛下經理之法
今官三十員皆給俸錢幹力及厨廩什器建造廳宇約計一月不減
百萬以他司息例準之當以錢二十萬爲之本方獲百萬之利若均
本配人當復除二百戶或許其入流反覆計之所損滋甚當今閔輔

大病皆爲百司息錢傷人破產積於府縣實思改革以正本源又臣嘗計天下財賦耗斁之大者唯二事焉最多者兵資次多者官俸其餘雜費十不當二事之一所以黎人重困杼軸猶空方斯輯熙必藉裁減今四方形勢兵罷未得資費之廣蓋非獲已陛下躬行儉約節用愛人豈俾閑官復爲冗食籍舊而置猶可省也若之何加焉陛下必以制出不可改請重難慎擇遷延寢罷其事竟不得行旣而楊炎譴逐旣濟坐貶處州司戶後復入朝位終禮部員外郎傳師擢進士登制科乙第授太子校書郎鄆縣尉直史館轉左拾遺左補闕並兼史職遷司門員外郎知制誥召充翰林學士歷司勳兵部郎中遷中書舍人性恬退無競時翰林未有承旨次當傳師爲之固稱疾宣召不起乞以本官兼史職俄兼御史中丞出爲潭州刺史湖南觀察使入爲尚書右丞出爲洪州刺史江南西道觀察使轉宣州刺史宣歙池觀察使入爲吏部侍郎太和元年卒年五十九贈吏部尚書初傳師父旣濟撰建中實錄十卷爲時所稱傳師在史館預修憲宗實錄

未成廉察湖南特詔齎一分史藁成於理所有子樞詢皆登進士第
詢歷清顯中書舍人翰林學士禮部侍郎咸通中檢校戶部尚書潞
州長史昭義節度使爲政簡易性本恬和奴歸秦者通詢侍者詢將
戮之未果奴結牙將爲亂夜攻府第詢舉家遇害

史臣曰前代以史爲學者率不偶於時多罹放逐其故何哉誠以褒
貶是非在於手賢愚輕重繫乎言君子道微俗多忌諱一言切已嫉
之如讎所以岫薦坎壈於仕塗沈柳不登於顯貫後之載筆執簡者
可以爲之痛心道在必伸物不終否子孫藉其餘祐多至公卿者蓋
有天道存焉

贊曰褒貶以言孔道是模誅亂以筆亦有董狐邦家大典班馬何辜
懲惡勸善史不可無

唐書列傳卷第九十九